



Alexander Flores: Resultado di MRI ta duna señal di un recuperacion prometedor



Pagina 6

- CAft ta subraya progreso financiero pero riesgonan pa cu HOFA ta persisti

Pagina 4

- Transferencianan Interbancario na Aruba a yega record nobo den 2025

Pagina 3

- Eduard Pieters di fraccion di PPA: Guido di nos grandinan den crisis

Pagina 6

Un bida saludable awe ta determina calidad di bida na edad halto



Pagina 2

Incidentenan di trafico na Corsou ta sigui aumenta



Pagina 8

Guatemala: Periodista veterano ta denuncia 'pacto corrupto'



Pagina 10



ARUBA Ariba

★ EVERY TUESDAY & WEDNESDAY ★
EARN 50 POINTS = \$10 IN SLOT CREDIT

FREE
ENJOY AN "ARUBA Ariba" COCKTAIL

QUIZ
ANSWER = ADDITIONAL \$10 SLOT CREDIT



Scan & Win!

THE CASINO AT
ST. REGIS
ARUBA

Restructuracion di cuida pa adulto mayor ta esencial

Ta ora pa realisa cu un bida saludable awe ta determina calidad di bida na edad halto

E suma di 26 miyon cu SABA ta ricibi como subsidio pa percursu pa un cuida di calidad pa adultonan mayor no ta suficiente. Realidad financiero di Aruba ta algo cu Direccion Asuntonan Adulto Mayor, Directie Ouderenzorg Aruba ta tene bon na cuenta. Ta p'esey mes kier amplia e sistema pa stimula pa adultonan por keda mas tempo posibel na nan mesun cas, cerca nan mesun hendenan y aki ta unda lo por bin un sistema di subsidio pa facilita esaki.

Director di e direccion. Desiree Helder a bisa esaki durante e sesion di pregunta organisa pa Parlamentarionan di Reino kendenan tabata na Aruba pa IPKO. E Parlamentarionan a haci diferente pregunta riba e presentacion di e status di cuida pa adulto mayor na Aruba.

Helder a bisa cu e maneho di Gobierno ta dirigi pa stimula 'mantelzorg,' esta cu famianan of amigonan ta percursu pa cuida mas tanto cu por, pero cu sosten di ayudo publico den infraestructura. Entre otro, ta pensa riba un mecanismo unda por trece adaptacion fisico na cas pa facilita e trabou, pero tambe crea mas facilidad den bario, cera di esnan cu mester di cuida, pa evita cu hendenan grandi ta cay den isolacion. "Tin como 30 grupo pa adultonan mayor na Aruba, cu ta percursu pa actividadnan. Hopi ta adultonan mayor mes cu ta organisa e gruponan aki, sea ta actividad social y fisico. Pero mester di actividadnan pa otronan cu mester di atencion. No tin centronan asina sin mas. Na e momentonan aki, esnan cu por paga pa bay un centro asina, unda ta hiba nan mainta y ta busca



nan atardi." Helder a bisa cu ehempel ta uno cu Gobierno mes a habri recientemente na Piedra Plat unda personanan cu limitacion por reuni a base diario, te cu 5or di atardi. Nan mester paga un suma limita, cu ta cubri cuminda y bebida. E intencion ta pa habri mas di e centronan pa pasadia den diferente bario, preferiblemente cerca di unda nan ta biba pa asina facilita e transporte. Di e forma aki por percursu pa centronan unda adultonan mayor por ta den un ambiente sigur.

"No ta solamente cuestion di medicalisa, tin un maneho estableci pa e Minister anterior y Profesor Anne Mei-The unda ta enfoca riba bon cuida y e socialisacion, cu ta dirigi na bienestar y tin goso, cu ta elementonan importante pa salud mental. Sinembargo e ta esencial pa yega na un bon formula pa asina anda

mas eficiente cu e medianan disponible. Asina ta pensa riba traha cu voluntarionan, incluso organisacionnan di hoben."

Tambe lo mester bin reorganizacion den e oferta di cuida. Na e momento mayoraria cuida specialisa ta concentra na e casnan cu ta cay bou SABA. "No ta e forma mas eficiente pa anda cu personal specialisa, kendenan en realidad mester ta unda tin situacionnan compleho." Segun Helder kier haci miho uso di e personal cu tin aworaki y tambe cu e medianan cu tin aworaki.

Prevencion

Tambe ta trahando cu Direccion di Salud Publico pa evita cu e problema di adulto mayor bira un crisis, pasobra los di e isolacion social, tambe hopi ta confronta cu problema di salud. Ta hendenan cu debi na e estilo di bida, of no ta bira hopi bieu of ta bira bieu cu hopi problema, sea ta presion halto, diabetes, cu por produci stroke y ta produci movilidad limita. "Nos mester evita cu hendenan cu ta bira grandi ta lucha cu un situacion di bida compleho. P'esey mester cuminsa cu medidanan preventivo, pa percursu cu hendenan ta biba mas saludabel pasobra un bida salud ora ta jong ta nifica un miho salud ora ta adulto mayor. Pero, nos mester percursu tambe cu esnan cu ya ta

malo, pa nan bira mas malo. Nos no kier pa un persona cu presion halto sufri un derrame, of un hende cu diabetes, pa falta di regulacion, mester confronta un amputacion of pio ainda, bira dependiente di dialyse."

Pues ta cuestion di traha riba prevencion na tur nivel. Ta bisa esaki pa hopi tempo caba, pero awor ta mira e resultadonan di un bida no saludabel. Helder a bisa cu no ta solamente traha riba prevencion pero mas bien conscientisacion, pasobra "nos a ripara na Aruba, hende ta relativamente pasivo. No ta prepara nan mes pa bira bieu y no ta consciente di e medianan financiero cu mester, ni ta percursu pa testament por


ehempel, percursu pa apunta un hende como curator. Tin biaha mester tin un hende di confianza pa por tuma tareanan y cargonan ora cu e individuo mes no por, y no ta nipensariba e red social. "Hopi hende ta biba pa biba, no tin ni contacto cu bisina, pero locual nos a ripara cu un persona por cuminsa planea for di trempa kico tin na sosten, por ehempel amigo of hasta si e cas ta adecuado.

E Director ta urgi pa hendenan ta mas consciente riba kico mester haci pa ora nan bira adulto mayor y no depende unicamente kico Gobierno por haci. "E lunanan aki nos lo dedica atencion riba e tema con por bira grandi financieramente responsabel," Helder a bisa.

Tabatin hopi interes di e Parlamentarionan riba e tema y Desiree Helder a pidi e Parlamentarionan Hulandes pa ayudo particular, esta pa yuda Aruba cu experticio riba e tereno aki, incluso riba trayectorianan educativo pa haya mas persona capacita pa traha den e sector aki.

"Traha eficiente cu placa, cu ta limita na Aruba, teniendo na cuenta e aspectonan cultural di Aruba cu kizas ta rekeri acercamentonan cu ta traha miho den e sociedad aki. Esey ta e obhetivo.

"Na Aruba nos ta mas pega cu famianan y esey por yuda cu ta crea un estructura unda ta brinda ayudo na hendenan grandi. Si nos por traha hunto pa sostene otro riba por ehempel e problematica di demencia, esey lo ta algo positivo."



Transferencianan Interbancario na Aruba ta yega record nobo na 2025, cu crecimiento fuerte y mas stabiel

E sistema di pago interbancario di Aruba a registra un otro año di crecimiento na 2025, cu amenton den tanto e cantidad como e balor di transaccionnan procesa entre banconan local. E ultimo Annual Interbank Transfers Analysis (Análisis Anual di Transferencianan Interbancario) publica pa Centrale Bank van Aruba (CBA) ta muestra cu mientras cu e crecimiento a sigui na un ritmo saludable, e tabata un poco mas modera cu e año anterior, reflehando un sistema cu ta expande y madura constantemente.

Na 2024, banconan a procesa 3.6 miyon transferencia interbancario. Esey a representa un aumento di 18.3% compara cu 2023. Na 2025, e cantidad total di transferencia interbancario procesa cu exito a subi mas ainda te na 4.2 miyon. Esaki a marca un aumento di 14.4 % riba 2024.

E cifranan ta muestra cu 600 mil transferencia mas a ser procesa na 2025 compara cu



e año anterior. Aunke e porcentahe di crecimiento a baha un poco, e volumen total a alcanza un record nobo. Esaki ta sugeri cu transferencia interbancario ta birando un metodo di pago mas y mas comun pa tanto individuonan como negoshinan.

E balor total di e transferencianan aki tambe a subi. Na 2024, e balor combina di transaccionnan interbancario a yega Afl. 14.5 biyon, un subida di 12.1% for di Afl. 12.9 biyon na 2023. Na 2025, e balor a subi atrobe na Afl.

16.2 biyon. Esaki tabata otro subida di 12.1% compara cu e año anterior. E Afl. 1.7 biyon di aumento den balor di transaccion entre 2024 y 2025 ta subraya e expansion continuo di actividad economico cu ta move door di e sistema bancario. Aunke e crecimiento di porcentahe no a acelera, el a keda fuerte y consistente, kedando den cifranan dobel pa di dos año tras di otro.

Mirando e datonan durante varios año ta duna un contexto util. Na 2021, e cantidad di transferencia interbancario a

crece drasticamente cu 38.6% compara cu e año anterior. E crecimiento despues a baha te na 24.1% na 2022, 23.2% na 2023, y 18.3% na 2024. Na 2025, crecimiento a modera mas ainda te na 14.4%.

Un patronchi similar por ser mira den e balor di transferencianan. E tasa di crecimiento anual den balor total tabata na 13.2% na 2021 y 13.5% na 2022. El a alcanza su maximo na 17.4% na 2023 prome cu el a yega na 12.1% na tanto 2024 como 2025. E cifranan aki ta sugeri cu e sistema a experiencia un periodo di expansion rapido den mas trempa den e decada y awor ta move den un fase mas stabiel di crecimiento constante.

Un otro indicador importante ta e cantidad di transferencia interbancario pa capita. E medida aki ta refleha con frecuente, averahe, cada residente ta usa transferencianan interbancario. Na 2022, tabatin 23 transferencia pa capita. E cantidad ey a subi te na 29 na 2023 y 34 na 2024. Na 2025, el a subi atrobe te na 38 transferencia pa capita.

E aumento constante den uso per capita ta muestra cu transferencianan bancario electronico ta birando mas integra den bida financiero diario. Ta parce cu consumidornan ta usando canalnan digital mas frecuentemente pa paga cuentanan, transferi fondonan y regla transaccionnan. Negoshinan probablemente tambe ta depende mas riba pagonan electronico pa salario, pagonan di proveedor, y otro operacionnan financiero.

Datonan trimestral ta reforsa e tendencia anual general. Na 2024, cada kwartaal a registra volumennan di transaccion mas halto compara cu

e mesun kwartaal na 2023. E patronchi di subida a sigui na 2025, cu cada kwartaal ta surpasa su contraparte di 2024 den e cantidad di transferencia procesa cu exito.


E mesun aumento constante por ser observa den e balor di transaccionnan. Cada kwartaal di 2025 a registra un balor total mas halto cu e kwartaal correspondiente na 2024. Esaki ta indica cu crecimiento no tabata limita na un tempo specifico di año, pero mas bien a plama consistentemente den tur cuater kwartaal.

E hecho cu e rapport di 2025 ta subraya transferencianan “procesa cu exito” tambe ta muestra riba e confiabilidad operacional di e sistema. Segun cu e volumen di transaccion ta aumenta, mantene eficiencia y minimalisa problemanan di procesamiento ta bira mas importante ainda. E crecimiento continuo ta sugeri cu e infraestructura di pago ta sigui cu e demanda creciente.

En general, e comparacion entre 2024 y 2025 ta pinta un bista cla di un sistema di pago cu ta tanto expandiendo como estabilizando. E volumennan di transaccion ta na un nivel record, y e balor total di transferencia ta sigui crece na un ritmo fuerte. Na mesun momento, e alivio gradual di e tasanen di crecimiento ta indica cu e aumento extraordinario mira den añanan anterior a transiciona den un expansion mas sostenibel.

E aumento di 3.6 miyon transferencia na 2024 pa 4.2 miyon na 2025 ta refleha confiansa continuo den metodonan di pago electronico. Mientras tanto e subida di balor total for di Afl. 14.5 biyon pa Afl. 16.2 biyon ta subraya e rol central di transferencianan interbancario den e sistema financiero di Aruba.

Segun cu Aruba ta move den 2026, e datonan ta sugeri cu transferencia interbancario electronico lo keda un parti clave di e infraestructura financiero di e pais. Cu uso per capita creciente, ganashi trimestral consistente, y crecimiento stabiel den balor total, e sistema ta muestra cu e ta bon posiciona pa sostene actividad economico continuo den e añanan binidero.



CAft ta subraya progreso financiero pero riesgonan segun preocupacionnan pa cu HOFA ta persisti

College Aruba financieel toezicht (CAft) a presenta un evaluacion ampliamente positivo di e trayectoria financiero di Aruba, mientras cu a adverti cu riesgonan estructural ta keda y reformanan continuo ta necesario pa salvaguardia estabilidad a largo plaso. E evaluacion emiti ta bini na momento cu debate politico ta sigui riba e Ley di Reino pa finanzas publico sostenibel, comunmente referi na dje como HOFA.



Riba 26 y 27 di februari, CAft a bishita Aruba y durante e bishita aki, CAft a papia cu Gobernador, ministernan di Finanza, Asuntonan Economico, Husticia, Integracion y Transporte Publico, cu Consejo di Minister, Parlamento di Aruba, Algemene Rekenkamer Aruba (ARA) y companianan manera Utilities y Refineria di Aruba. E discusionnan a enfoca riba desaroyonan fiscal, reformanan di gobernacion, y e cuadro mas amplio pa supervision financiero dentro di Reino.

Den un comunicado oficial, CAft a yama bon bini na e esfuersonan di Aruba pa fortifica gobernacion financiero, particularmente den relacion cu empresanan estatal. E institucion a expresa sosten pa e intencion di gobierno pa introduci un politica amplio cu ta goberna accionnan publico y distribucion di dividendo. E politica aki, hunto cu un cuadro di gobernacion corporativo plania, ta spera di mehora transparencia, aclarea responsabilidadnan, y reduci riesgonan financiero asocia cu entidadnan liga na gobierno.

Companianan estatal ta hunga un rol significativo den economia di Aruba, pero CAft a señala cu nan tambe tabata un fuente di vulnerabilidad financiero den pasado. E organo di supervision a cita ehempelnan caminda supervision of tumamento di decision inadecua a conduci na resultadonan desfavorabel, incluyendo areglonan di financiamiento costoso y e uso di fondonan sin autorisacion apropiada. E casonan aki, segun CAft, ta subraya e importancia di rolnan claramente defini dentro di e estructura di gobernacion. E organo di supervision ta spera cu e min-

ister di Finanzas fungi como accionista na nomber di gobierno, mientras cu ministernan di liña ta duna direccion di politica y e companianan mes ta keda responsabel pa ehecutcion.

CAft a enfatisa cu e exito di e reformanan aki lo depende no solamente di e adopcion di politicanan nobo pero tambe di nan ehecutcion consistente. E organo a enfatisa cu reglanan cu ta regla participacion estatal y distribucion di dividendo mester ser aplica den practica pa garantisa cu riesgonan ta ser identifica trempan y cu empresanan publico ta contribui efectivamente na e obhetivonan financiero y social di e pais.

Fuera di empresanan estatal, CAft a hala atencion riba riesgonan financiero specifico dentro di e sector publico. Un area di preocupacion ta e posicion financiero di Hospital Dr. Horacio Oduber, un instituto di cuido medico critico cual su gastonan finalmente ta cay riba gobierno a pesar cu estado no tin control directo di propiedad. CAft a urgi autoridadnan pa traha pa un solucion sostenibel den colaboracion cu stakeholdernan di hospital, señalando cu asuntonan no resolvi por pone presion adicional riba finanzas publico.

Na mesun momento, CAft a reconoce progreso significativo den administracion financiero di Aruba. Segun e organo e pais a atende cu exito e atrasonan di hopi den su cuentanan anual, cu estadonan financiero te cu y incluso 2024 awor entrega na ARA. E desaroyo aki ta marca un paso importante pa mehora transparencia y responsabilidad. Sinembargo, CAft a adverti cu mester haci mas trabou pa mehora e calidad

y confiabilidad di reportahe financiero, describiendo esaki como un reto clave pa e siguiente fase di reforma fiscal.

E organo di supervision a atende tambe e Ley di Reino proponi tocante finanzas publico duradero. Segun CAft, e legislacion lo provee un cuadro structura pa supervision financiero mientras e ta ofrece beneficiacion economico real. Un di e bentahanan principal cu a subraya ta e potencial pa gastonan di fianza mas abou. Bou di e areglo proponi, Aruba lo por refinancia debenan existente pa medio di Hulanda na interesnan mas faborabel y haya acceso na financiamiento nobo pa proyectonan di inversion. CAft ta calcula cu e medidanan aki lo por resulta den economia anual di te cu 60 miyon florin, ekivalente na mas di 500 florin pa cada habitante.

Mientras cu e posicion di CAft ta enfoca riba e meritonan financiero y tecnico di e proposicion, e tema ta keda politicamente sensitivo. Durante e mesun bishita, e institucion a tene reunion cu miembronan di Parlamento, caminda puntonan di bista diferente riba HOFA a keda expresa.

Durante e reunion aki lider di fraccion di MEP parlamentario Evelyn Wever-Croes, un biaha mas a delinea su oposicion contra e actual concepto di e ley. Su presentacion a duna un critica detaya di e proposicion, enfatisando preocupacionnan tocante necesidad, contenido y implicacionnan potencial pa autonomia di Aruba.

Wever-Croes a cuminsa na subraya e logronan fiscal recien di Aruba, argumentando

cu nan ta demostra e capacidad di e pais pa maneha su finanzas independientemente. El a muestra riba un surplus presupuestario di aproximadamente 2,6% y a señala proyectacionnan cu ta indica cu e debe nacional por baha te na 47% di e GDP pa 2028. E resultadonan aki, el a declara, ta e resultado di disciplina fiscal sosteni y continuidad den trahamento di politica den gobiernonan sucesivo.

Segun su presentacion ya Aruba ta opera bou di un sistema efectivo di supervision financiero pa medio di legislacion nacional y supervision di CAft. El a argumenta cu e cuadro aki a resulta capaz pa duna resultado, haciendo e introduccion di un Ley di Reino innecesario. Den su bista, adopta HOFA lo agrega limitacionnan sin hustificacion cla, particularmente mirando e progreso alcanza caba.

Un parti significante di su critica a enfoca riba e contenido di e legislacion proponi. Wever-Croes a argumenta cu e concepto actual ta desvia di palabracionnan anterior cu a yega na dje entre Aruba y Hulanda. El a muestra particularmente riba e inclusion di un cantidad grandi di norma fiscal—alrededor di 20— a pesar di recomendacionnan di e Fondo Monetario Internacional pa limita e cantidad di e tipo di referencianan ey. El a sugeri cu e complejidad di e rekisitonan aki por crea retonan pa implementacion y reduci flexibilidad di politica.

E normanan aki ta mara na condicionnan cu Aruba mester cumpli cu ne pa por sali for di e cuadro di supervision. Wever-Croes a describi e provisionnan di salida como mucho pisa y faltando claridad. Hasta si cumpli cu tur condicion, toch Aruba lo mester di aprobacion di Hulanda pa bandona e areglo, loke el a argumenta por conduci na dependencia prolonga y incertidumbre.

Wever-Croes a contrasta esaki cu acuerdonan anterior dentro di Reino cu a inclui mecanismonan di salida cla y mara na tempo, permitiendo paisnan pa recobra autonomia completo despues di un periodo defini sin negociacionnan adicional. E ausencia di un mecanismo asina den e proposicion actual a ser pre-

senta como un preocupacion clave.

Otro tema cu a ser treci dilanti durante su presentacion ta relaciona cu e refinanciamiento di e debe existente di pais Aruba. Mientras cu mehoracion di condicionnan di financiamiento hopi biaha ta ser cita como un beneficio grandi di HOFA, Wever-Croes a señala cu e compromisonan aki no ta explicitamente hinca den e texto legal. Esaki, el a argumenta, ta crea incertidumbre tocante si e beneficiacion anticipa lo ta garantisa den practica.

Ademas di consideracionnan financiero, el a expresa preocupacion tocante e implicacionnan constitucional di e ley proponi. Cierta provisionnan pa aprobacion externo di decisionnan financiero domestico, a ser describi como potencialmente den conflicto cu e cuadro constitucional di Aruba. Mientras cu mecanismonan similar a existi den practica bou di areglonan anterior, nan inclusion formal den un Ley di Reino lo representa un cambio significante den gobernacion.

Wever-Croes a reconoce cu menos gastonan di prestamento ta un obhetivo importante y cu Aruba ta para pa beneficia di un mehoracion di acceso na financiamiento. Sinembargo, el a splica cu e beneficiacion ey por ser alcanza a traves di palabracionnan alternativo, manera acuerdonan bilateral, sin e necesidad di adopta un Ley di Reino obligatorio.

E reunion entre CAft y Parlamento a subraya e complejidad di e tema. Di un banda, e evaluacion di CAft ta muestra riba bentahanan financiero cla y un cuadro structura pa supervision. Di otro banda, preocupacionnan lanta pa parlamentarionan ta refleha preguntanan mas amplio tocante autonomia, responsabilidad, y e implicacionnan a largo plaso di supervision externo.

Segun cu Aruba ta sigui construi riba su progreso fiscal recien, e decision si ta adopta HOFA ta keda un pregunta clave di maneho. E resultado lo forma no solamente e maneho financiero di e pais pero tambe su relacion institucional den Reino.

Editor

Caribbean Speed Printers N.V.
Aruba Bank N.V. Acc. #332668
Caribbean Mercantile Bank N.V.
Acc. #23951903
RBC Royal Bank Acc. #13307728

Operations Manager

Mariette Engelhart-Boekhoudt

Redaccion

noticia@bondia.com

Pilar Flores (hefe di redaccion)
Angenette Figueroa (closer editor)

Leo Maduro
Dilma Arends
Raisa Montilla
Oriana Geerman

Ehecutivo di Benta

Sulaika Croes
sulaika.croes@cspnv.com
Mark Gomes
mark.gomes@cspnv.com

Aviso y Arte

Sandra Loefstop
Lisa Tromp

Departamento Digital

Juan Luis Pinto

Administracion
accounting@bondia.com

Martha Arteta de Ariza

Distribucion

Jenny Kelly

Coleccion

Evelinda de Cuba - Tromp

Pre Press

Luis Fernando Arenas (Hefe)
Pablo Libre

Press

Roland Schenker (Hefe)
Omar Ramirez
Martin Boekhoudt
Francis Dirksz

Colaboracion

Associated Press
Ret Karibense
Data Key

Afiliacion

Sociedad Interamerica
di Prensa (SIP)

DIRECCION

Adres: Weststraat #22
Tel: 582-7800
Email: noticia@bondia.com
aviso@bondia.com
info@bondia.com
Website: www.bondia.com
Facebook: @bondianoticia
Instagram: bondiaaruba

BON DIA ARUBA ta un corant redacta y imprimi na Aruba y ta obenibel di dialuna te cu diasabra. Ningun contenido por wordo reproduci sin permiso di editor.

ATA:

Aruba presente na ANATO 2026

Un vision reforsa pa crecimiento regional, conexion aereo mas ampleo y un turismo mas consciente

Aruba a participa un bes mas na ANATO, un di e vitrina, esta 'showcase', turistico mas importante den Latino America, cu a tuma luga entre 25 y 27 di Februari na Corferias, Bogota. Den e edicion aki, Aruba a presenta un propuesta enfoca riba consolidacion di e mercado Colombiano y Latino Americano, fortalecimiento di conectividad aereo y evolucion pa un turismo di mas balor y mas consciente.

Cu un delegacion di 29 representante di sector priva incluyendo hotelnan, DMC, operadornan di tour y servicio specialisa, Aruba ta reafirma su compromiso profundo cu e mercado Latinoamericano. ANATO ta sirbi como un plataforma esencial pa amplia y fortifica alianzanan y pa muestra mas di loke Aruba ta ofrece como destinacion. E tema e aña aki tabata "Colombia abierta al mundo" y a conta cu mas di 1.600 exposicion y un publico di alrededor di 10 mil participante pa dia.

E ekipo di Aruba Tourism Authority (A.T.A.) a tene un agenda intensivo durante ANATO na Colombia, incluyendo entrevista cu diferente medionan, reunionnan strategico cu aerolineanan manera Avianca, Wingo, Copa y Gol, y reunionnan cu socio importante di trade turistico. Nan a inaugura tambe e booth di Aruba na Vitrina Turistica hunto cu embahadora di Reino Hulandes, Señora Reina Buijs, y Holland House.

Impacto fuerte di mercado Latino America

Aruba a ricibi 1.515.102 bishitante internacional den 2025, un aumento di 6.6% compara cu 2024. Region Latinoamericano a contribui cu 231.939 bishitante, un crecimiento notable di 27%, aumentando participacion


regional te 15%. Esaki ta confirma e rol esencial di e region pa Aruba.

E strategia ta pa stabilisa mercado di Colombia y diversifica dentro di Colombia. E perfil di bishitante di Brasil, Chile, Argentina ta significante y p'esey mes e strategia conforme 'high value markets' ta pa crece e mercadonan aki. A sigura mas vuelo di LATAM Airlines entrante April cu ta move di 5 pa 7 vuelo semanal. Ademas, a introduci vuelonan non-stop for di Argentina entrante Januari 2026 y ta conta cu expansion di COPA y hopi frecuencia di Avianca entre otro.

Un año di union cultural y presencia regional

E trabou den exterior ta sigui. Aña 2026 ta carga di celebracion y simbolismo cultural: 50 aña di Himno y Bandera di Aruba, 40 aña di Status Aparte y 200 aña di relacion comercial entre Reino Hulandes y Colombia. A.T.A. lo organisa actividadnan den henter region di Latino America, incluyendo celebracion di 18 di Maart hunto cu media pa honra simbolonan nacional di nos isla. Aruba tambe lo participa den Copa Colsanitas y lo presenta evento gastronomico nobo pa muestra cultura culinario di isla, un di e experiencianan cu biaheronan Latinoamericano ta aprecia mas.

E resultadonan y proyecionnan pa 2026 ta reforsa cu Latino America ta keda un mercado esencial pa Aruba. Diversificacion ta un pilar central den e strategia di A.T.A., y cu un enfoca mas consciente riba desaroyo turistico. Den colaboracion constante cu diferente socio den region, A.T.A. ta compromete pa sigui cu un modelo di turismo mas responsable, di balor haltu y alinea cu e cambio den demanda di biaheronan actual.



Alexander Flores: Resultado di MRI ta duna señal di un recuperacion prometedor

Durante weekend noticia a surgi tocante e status medico di e criatura di cinco aña di ken su caso di abandono den auto a sacudi pueblo y a resulta den un translada urgente pa hospital na Colombia unda awor e ta bao tratamiento critico.

E caso di Alexander a causa gran indignacion den pueblo despues cu a hay'e inconsciente den auto, supuestamente cera eyden pa cinco ora largo. Diasabra mas noticia a sali riba red social via plataforma noticiero ATK notisia y mas, unda a comparti e status di e mucha cu actualmente na Colombia hunto cu su mama y tata. Segun e medio ta reporta, resultado di test di MRI cu a haci diabierna



ultimo a muestra cu daño cerebral tabata menos cu loke a anticipa, cual ta un señal prometedor pa Alexander. Segun a sigui reporta, diasabra a cuminsa baha remedi di sedacion poco poco pa mira si e criatura lo por lanta riba su mes. Tambe a observa movimiento, Aunke Alexander ai-

nda ta inconsciente, a nota cu e ta moviendo su curpa si, cual ta indica na dokternan cu tin bida ainda. Segun e medio ta comparti, el a hasta purba ranca tubo.

Pa e motibo aki dokternan mester a mar'e un poco pa su mesun seguridad. A pesar cu

Alexander ta desafiando expectativanan caba, dokternan ta enfatisa cu ainda no por bisa cu certeza kico e consecuencianan pa e mucha lo ta, ya cu e ta creciendo ainda. Pa por tin un bista mas cla, mester conduci varios test durante e proximo dianan.

Den comentarionan di e publicacion, centenares di usuario a expresa nan alivio y ta sigui resa y duna apoyo na e criatura y su famia.

Diamars atardi comunidad a ser sacudi pa e noticia cu un mucha homber di 5 aña a ser lubida den un vehiculo di e crèche cu e ta bishita cu consecuencia cu el a stop di reaccion y su curason a para. Segun informacion oficial di Cuerpo Policial di Aruba,

diamars atardi central di Polis a ricibi notificacion door di AC (alarm central) di un caso serio na unda cu un mucha homber di 5 aña a yega na Imsan y e no tabata reacciona. Di biah dokter y persona na Imsan a cuminsa cu reanimacion y a traha hunto pa asina por a logra haya un pulso.

Segun prome informe di Polis, a haya e mucha homber den un vehiculo cu ta ser usa pa transporte di mucha, di scol pa e crèche cu e ta bishita. Segun informacion, na momento cu a haya e mucha homber ya e tabatin basta rato den e vehiculo y no tabata reacciona.

E caso ta den man di autoridadnan concerni pa asina investiga kico a pasa.

Eduard Pieters di fraccion di PPA:

“Cuido di Nos Grandinan den crisis: Parlamento a vocifera cu awor ta ora pa ehecuta!”

Parlamentario Eduard Pieters di fraccion PPA a presenta un mocion fuerte durante reunion publico di diahuebs tocante situacion di cuida di adulto mayor na Aruba. E mocion tabata presenta cu argumento solido y a haya aprobacion tambe di henter cuerpo di Parlamento

Esey kiermen cu Parlamento a manda un mensahe cla pa gobierno: situacion di cuida di nos grandinan no ta sostenibel mas y mester accion structural inmediato. Awor responsabilidad ta na minister. Un Rapport cu no por ignora

Base di e mocion tabata e rapport di Inspectie Volksgezondheid Aruba (IVA), titula “Als zorg levens kost”. “E rapport aki a muestra claramente e deficiencianan serio den e centronan di cuida: caida, infeccion, negligencia y hasta consecuencia fatal. Inspectoria a indica cu hopi incidente no ta casualidad, pero resultado di problema structural, manera: falta di personal, falta di experticio, gobernacion deficiente (“bad governance”) y maneho reactivo en bes di sistematico. Inspectoria mes a pidi un enfoque sistematico di maneho, no solamente intervencion, ora un problema presenta,” Eduard a señala. Esaki no ta



un simpel recomendacion, sino un alarma.

Presion riba sistema no ta sostenibel

Pa fraccion di PPA, e mocion aki ta reconoce cu presion riba e casnan di cuida actualmente no ta sostenibel mas. Siguridad y dignidad di e cliente mas vulnerabel ta bou riesgo. P'esey e mocion aki no ta pidi mas estudio, sino ta pidi deadline concreto: Den maximo 2 luna: finalisa y presenta un maneho nacional pa cuida di adulto mayor na Parlamento;

Den 3 luna: ehecuta e normanan di calidad pa garantiza seguridad den casnan di cuida;

Den 3 luna: presenta un plan di ehecucion cu meta, e actividadnan y e indicadornan midibel;

Den prome presupuesto supletorio 2026: aloca e fondonan necesario pa ehecuta e plan.

Esaki no ta sugerencia, sino un mandato parlamentario.

Di plan bunita na resultado real

Loke ta haci e mocion aki

fuerte ta su enfasis riba implementacion. Segun Pieters: “No solamente vision, pero plan cu midimento. No solamente palabra, pero presupuesto. Durante aña, cuida di adulto mayor a wordo discuti den termino di plan futuro, grupo di trabou y estudio adicional. Pero realidad ta cu; vergrijzing a sigui crece, lista di espera a sigui crece, presion financiero a aumenta y e famianan ta perde confianza”.

“E mocion ta reconoce cu un enfoque integral ta sumamente necesario: mehora calidad

den e casnan di cuida y fortalece apoyo pa esunnan cu ta biba na cas. Vision tin balor, pero sin ehecucion, vision ta keda solamente riba papel,” Eduard a enfatisa.

Un test di responsabilidad politico

Awor cu a aproba e mocion unanimamente den Parlamento, e preguntanan crucial ta:

-Minister Wyatt Ras lo respeta e deadline?

Lo tin e fondonan real aloca?

Lo bin cu un plan di ehecucion cu tin resultado midibel?

Cuido di adulto mayor ta toca tur famia na Aruba. No ta solamente algun cifra preocupante, ta nos mama, nos tata, nos wela, nos welo.

Finalmente parlamentario Pieters ta gradici su coleganan parlamentario, cu a pone tur color politico un banda y a aproba e mocion aki cu ta pa bienestar di Aruba completo. Parlamento a papia cla: basta cu pospone decision. Fraccion PPA a tuma su responsabilidad. Awor ta momento pa ehecuta, pasobra nos grandinan mester y merece un cuida cu ta protega nan bida.

Nota di redaccion: E articulo aki ta opinion di e autor y no ta representa opinion di Bon Dia Aruba.

Dinamarca ta prome pais di EU cu a elimina transmision di HIV di mama pa yiu, segun WHO

(AFP)—Dinamarca a bira e prome pais den Union Europeo cu a elimina transmision di HIV y sifilis di mama pa yiu, e Organizacion Mundial di Salud (WHO) a bisa diabierna.

“Eliminacion di transmision di HIV y sifilis di mama pa yiu ta marca un logro grandi di salud publico pa Dinamarca,” director general di WHO Tedros Adhanom Ghebreyesus a bisa den un declaracion.

E organisacion internacional



di salud a bisa cu Dinamarca a cumpli cu metanan rekeri pa eliminacion for di 2021

te 2024, “incluyendo un tasa abao di transmision y cobertura halto di test prenatal y

tratamento pa muhernan na estado.”

“Eliminacion ta nifica haci test y trata por lo menos 95 di cada 100 muher na estado—y mantene infeccion nobo den baby bao di 50 pa cada 100.000 nacimiento,” Hans Kluge, Director Regional di WHO pa Europa, a bisa.

Segun cifra di WHO, Dinamarca tin un tasa abao di HIV y sifilis entre muhernan na estado. Rond di 5.950 persona ta biba cu HIV na

Dinamarca, y menos di 0.1 porciento di muhernan na estado ta afecta.

Sifilis congenito—cual ta nifica sifilis pasa for di mama pa baby—tambe ta comun.

Na 2024, 626 caso di sifilis a ser reporta den total, mayoria di nan, 524, den hombernan.

WHO tambe a bisa cu Dinamarca ta riba bon caminda pa elimina transmision di virus hepatitis B di mama pa yiu.

DVG ta amplia su canalnan di comunicacion pa mantene pueblo bon informa riba salud publico



DVG Aruba, keda bon informa a traves di Aruba Health

App, subi nos website www.dvg.aw, yama nos na 5224200

of mail nos na servicio@dvg.aw

Directie Volksgezondheid Aruba, DVG, ta reforza su compromiso pa mantene comunicacion cla, lihe y accesibel pa tur ciudadano. Meta principal ta sigura cu informacion importante riba salud publico ta yega na cada cas, cada bario y cada persona, sin importa si e persona ta usa social media of no.

Den un tempo unda informacion ta move lihe y situacionnan di salud por cambia den poco ora, comunicacion corecto y oportuno ta esencial. DVG ta consciente cu no tur hende ta activo riba social media, y p'esey a amplia y diversifica su canalnan pa alcanza e mayoria di nos poblacion.

Actualmente, ciudadano por sigui DVG riba:

- Facebook bou di e number Directie Volksgezondheid
- Instagram bou di e mesun number
- WhatsApp Channel oficial di Directie Volksgezondheid

- Aruba Health App, unda tur comunicado publico ta wordo publica
- Website oficial: www.dvg.aw

Cu e ampliacion aki, DVG ta crea mas cercania cu comunidad y ta fortalece su rol manera fuente confiabel di informacion riba enfermedadnan infeccioso, vacunacion, salud preventivo, emergencia sanitario y otro asunto cu tin impacto directo riba bienestar di nos pueblo. Salud publico ta responsabilidad di tur nos. Informacion corecto ta proteha bida, ta preveni desinformacion y ta yuda comunidad tuma decisionnan mas consciente.

Awo no tin ningun excuus pa keda desinforma, sigui nos riba nos canalnan oficial y keda al dia cu e ultimo desaroyo den salud publico.

Pa mas informacion like nos Facebook page, follow nos riba Instagram of den WhatsApp Channel bou number Directie Volksgezondheid

LUNA DI LOCURA!

CUMpra 2 LOTTO 5 Y HAYA 1 LOTTO 5 LOCO GRATIS

CON PA HUNGA?

CU CADA COMPRA DI 2 LOTTO 5 RIBA E MESUN TICKET TA RICIBI 1 LOTTO 5 LOCO COMPLETAMENTE GRATIS. MAS BO CUMpra, MAS TICKET LOCO GRATIS BO LO RICIBI!

PROMOCION TA VALIDO DESDE 1 DI MAART TE CU 31 DI MAART

www.lottoaruba.com

Corsou:**Corte ta mantene boet di \$50.000 pa construcccion laat na Coral Estate**

(CuraçaoChronicle) - E asociacion VvE di Coral Estate tin derecho di impone un boet di 50.000 dollar riba un propietario di tereno cu no a completa construcccion di un cas dentro di e tempo cu a acorda. E decision a keda stipula pa apelacion den **Gemeenschappelijk Hof van Justitie**.

E caso ta concerni un tereno dentro di Coral Estate Resort unda e dono no a caba di construi un residencia dentro di e tempo cu a stipula di acuerdo cu VvE su statuut y regulacionnan general. Bao e reglanan aki, doñonan di



propiedad ta rekeri completa construcccion dentro di un tempo, cu un castigo den contract di 50.000 dollar aplicable si surpasa e deadline.

Den e proceso di apelacion, e doño y partnernan asocia a argumenta cu e deadline di construcccion no tabata cla, cu

e pandemia di coronavirus a causa atrasonan parcialmente y malesa y cu e boet pa e motibo aki mester reduci e boet. Corte a rechasa e argumentonan aki.

Segun e decision, e obligacion cu ta stipula den regulacionnan di VvE tabata suficientemente cla. E cas ta rekeri di ta completo no mas cu 2 aña despues di a entrega e prome permiso di construcccion. Corte a mantene cu e emision di un di dos permiso of circunstancianan interno lo ta cambia e obligacion aki.

Corte tambe a tuma e decision di rechasa e peticion di

reduci e boet. El a haya cu VvE ya caba a otorga varios extension y tempo adicional prome cu a impone e boet. E cantidad di e boet a keda considera uno cu no ta excesivo y considera apropiada pa preveni cu terenonan lo keda sin desaroya pa periodonan extendi, cual por debilita e resort su concepto general.

Pa motibo cu e tereno ta pertenece na un partnership general, e partnernan individual tambe ta personalmente responsable pa e boet. Nan a ricibi orden di cubri e gastonan legal di e proceso di apelacion.

Ex presidente di Banco Central Emsley Tromp condena atrobe den apelacion

(CuracaoChronicle) - Ex presidente di Banco Central di Curacao y Sint Maarten, Emsley Tromp, a keda condena un biaha mas den corte di apelacion y sentencia cu un termino completamente suspendi di prison di 6 luna. E decision a keda otorga diaran son den e caso cu ta involucra falsificacion y complicidad.

E sentencia ta relaciona cu Tromp su rol como complice den e falsificacion di documentonan den un caso cu ta involucra un ex colega di



Banco Central. Segun corte, a usa influencia pa garantisar financiamiento di 400.000

dollar pa e compra di un propiedad. Parti di e cantidad aki supuestamente a keda

transferi na cuentanan di banco personal.

Tromp anteriormente a keda condena den un caso anterior pa accionnan fraudulentamente. Den procesonan actual, e enfoka ta especificamente riba su rol como complice na luga di e ofensor principal.

Den januari, Ministerio Publico (OM) un biaha mas a exige un sentencia den prison completamente suspendi di 6 luna den e caso di apelacion. Corte a sigui e peticion aki

den su decision.

E sentencia cu a impone ta nifica cu Tromp no lo tin cu cumpli tempo den prison, al menos cu e comete otro ofensa criminal durante e periodo aki.

E veredicto ta trece e proceso di apelacion den e caso aki na un clausura, reafirmando e resultadonan anterior di mal conducta relaciona cu e falsificacion di documento y acuerdonan financiero inapropia.

Incidentenan di trafico na Corsou ta sigui aumenta

(CuraçaoChronicle) - E cantidad di incidente den trafico y vehiculo involucra na Corsou a aumenta mas aleu den 2025 compara cu e aña anterior, segun un rapport di mercado nobo di ForenSys, e organisacion cu ta responsable pa prepara reportahenan di daño pa e companianan di seguro.

E cifranan ta demostra cu presion riba trafico di e isla no ta aliviando, sino ta sigui bira mas intenso. Den 2025, ForenSys a registra casi 12.000 incidente di trafico, un aumento di net mas cu 11.000 den 2024. Esaki ta representa un aumento di alrededor di 5%. E cantidad di vehiculo involucra tambe a aumenta, for di casi 21.000 den 2024 te na casi 22.000 den 2025. Segun e rapport, e aumen-

to den incidente ta sigui di cerca e crecimiento continuo di trafico riba e isla. E moda aki ta refleha den e expansion di vehiculo. Den 2023, e cantidad di vehiculo sigurata na 86.000. Esaki ta un aumento di net mas cu 87.000 den 2024 y despues a aumenta drasticamente na casi 94.000 den 2025, indicando un aceleracion den e crecimiento di trafico di vehiculo.

Mientras cu e riesgo relativo pa cada vehiculo a keda ampliamente stabil, e expansion rapido aki di e vehiculonan a resulta den un cantidad absoluto mas halto di accidente. Como resultado, ambos seguro y usuarionan riba caya ta enfrentando un peso di daño mas halto.

E rapport tambe ta nota cu e proporcion di inciden-



tenan cu ta involucra heridanen ta keda halto. Den 2024, casi 20 porciento di tur incidente den trafico a resulta den heridonan, un nivel cu a keda ampliamente sin cambia den 2025.

E conclusion principal cu a saca for di esaki ta cu e situacion di trafico general na Corsou no ta mehorando. Ambos e cantidad di incidente y e cantidad di vehiculo involucra ta sigui den aumento, mientras cu tasa

di riesgo ta keda sin cambia.

Esaki ta nifica cu crecimiento continuo den e vehiculonan ta directamente traduciendo na mas accidente y presion aumenta riba seguridad di caya y e sector di seguro.

Trahadornan di gobierno Hulandes lo tene welga nacional mañan pa motibo di congelacion di salario pa 2026

(NLTimes) - **Funcionari-onan publico Hulandes ta cla pa stop trabou pa 24 ora diamars, mañan, den un protesta tocante e congelacion di salario di e aña aki, marcando e siguiente escalacion den un disputa laboral continuo. E welga por stroba varios servicio di gobierno den henter e pais, NOS ta informa.**

E accion ta involucra partinan di e 160 mil Rijksambtenaren, e ambtenaarnan nacional cu ta traha pa gobierno central Hulandes. Ta anticipa cu hopi di e empleadonan aki lo reuni na Den Haag pa protesta contra e decision di gobierno pa implementa un asina yama “nullijn,” cu ta nifica



un congelacion di salario sin aumento di salario pa 2026.

E sindicato FNV a bisa cu e congelacion di salario ta reduci e poder di compra di e funcionarionan publico. Trahadornan na instancianan

ehecutivo ta particularmente afecta, e sindicato a bisa, señalando cu e oficinanan aki pa hopi tempo a confronta carga di trabou halto y scarsez di personal. “E hendenan aki ta haci e trabou cu ta mantene Hulanda ta draai, pero

nan no ta ser aprecia”, FNV a declara.

Accionnan recien riba escala mas chikito a inclui inspeccionnan di e Autoridad Hulandes di Seguridad di Producto di Alimento y Consumidor

(NVWA), cu a para trabou e luna aki, loke a causa cu algun abattoir den e provincianan oriental a cera.

Pa mañan, FNV a reconoce cu no ta cla con amplio e impacto lo ta. Ya caba ta confirma sinembargo cu e call center di DUO lo ta cera pa e dia.


Na Autoridad di Impuesto, cu a cuminsa su periodo di deposito di belasting diadomingo, liñanan di telefon por a mira trafico pisa. E autoridad a bisa cu e tempo di espera den tempo real lo ser publica online, y algun cita na centronan di sosten local pa asistencia por ser reprograma.

Ministerio di Exterior Hulandes a ricibi 1.000 yamada di ciudadanonan Hulandes den Medio Oriente

(NLTimes) - **Ministerio Hulandes di Asuntonan Exterior a ricibi alrededor di 1.000 peticion di informacion di ciudadanonan Hulandes cu ta den Medio Oriente despues di atakenan militar riba Iran door di Israel y Merca y siguiente atakenan di represalia di Iran den henter e region.**

E ministerio a bisa cu esnan cu a yama tabata inclui hendenan preocupa pa nan seguridad personal y tambe otronan cu tabata busca informacion tocante opcionnan pa bandona e region. Un vocero a bisa cu e ministerio a aumenta su centro di contacto pa atende e volumen di peticionnan.

“For di Den Haag y tur e puestonan den e region, nos ta



vigila e desaroyonan na Iran, Israel y e region mas amplio di cerca,” e vocero a bisa. “Nos ta conseha e ciudadanonan Hulandes den e region pa keda paden pa awor y evita lugarnan yen di hende y potencial blanconan pa atake.”

E ministerio tambe a urgi hende pa registra na su servicio di informacion di biahe pa

ricibi actualisacionnan, sigui instruccionnan di autoridadnan local, y informa famia of amigonan di nan situacion. E vocero a conseha pa tuma contacto cu e team di crisis di Asuntonan Exterior den casonan di emergencia.

Mientras tanto, biaheronan pega pa motibo di espacio aereo cera—incluso na

Dubai, Qatar y Emiratonan Arabe Uni—tin poco opcion cu warda den hotelnan, segun un vocero di KLM. “Ora ta posibel, nos lo trece nan afo,” e vocero a bisa. “Pero aworaki nos no por haci nada,” e vocero a indica na RTL. Con largo e situacion lo dura ta keda poco cla. “Nos ta depende di e autoridadnan.”

Biaheronan Hulandes cu vuelonan di conexion a traves di e region di Golfo tambe ta pega na otro partinan di mundo, incluyendo Asia, segun Algemene Nederlandse Vereniging van Reisonder-nemigen.

E organizacion a bisa cu opcionnan ta ser explora pa rebook pasaheronan via rutan alternativo, manera transferencia pa China of Turkia, of biahe riba tera. Biaheronan

pega den e Emiratonan Arabe Uni por biaha via tera pa Oman, caminda e aeropuerto den e capital, Masqat, ta keda habri.

Decenas di piloto y stewardess di KLM tambe ta pega na varios localidad, e compania di aviacion a bisa. “Nan tambe ta tratando cu preguntanan y incertidumbre,” e vocero a bisa. “Nan tambe ta un enfoke di nos atencion.”

Ministerio di Asuntonan Exterior a bisa cu ta mucho trempa pa considera repatriacion of evacuacion. “Esey ta depende di hopi factor,” e vocero a bisa. E ministerio ta funciona bou di un estructura di crisis for di diasabra mainta, cu tur escenario bou di revision.

Preso ta hinca security y tum’e como rehen na prison di Heerhugowaard

(NLTimes) - **Un security guard di prison a ser hinca y tuma como rehen diasabra atardi pa un preso na e penitenciaro na Heerhugowaard, den un incidente cu a encera tanto un hincamento como un rehen prome cu polis a termina e situacion y a detene e sospechoso.**

Polis a bisa cu servicio di emergencia a ser yama pa mas o menos 3:30 p.m. despues di un informe di un hincamento

paden di Penitenciaire Inrichting Heerhugowaard. Unabes cu oficialnan a yega, a sali na cla cu un security femenino tabata ser teni como rehen pa un detenido masculino.

Segun un vocero di polis, e detenido a hinca e security den cara y garganta usando un sker di un plachi kibra. Un negociador di polis y un team di aresto a keda desplega pa libera e victima. Oficialnan finalmente a domina e

sospechoso, y e situacion di rehen a termina alrededor di 5:00 p.m.

E security a ser hiba cu ambulance pa un hospital. Polis a bisa, “E victima, un security di PI Heerhugowaard, a ser transporta pa hospital den condicion stabiel y consciente. E sospechoso, un preso, a ser aresta y traslada pa un cel di polis. Detectivenan ta haciendo mas investigacion riba e sucesonan. Fin di e rapport.”



Guatemala: Periodista veterano ta denuncia ‘pacto corrupto’ menasando libertad di expresion

(AFP) – Un periodista veterano Guatemalteco, kende a pasa mas di tres aña cera despues di investiga corrupcion di nivel halto, a acusa e sistema di husticia, den un entrevista cu AFP, di opera como un organisacion “criminal” dirigi pa un “pacto corrupto.”

Jose Ruben Zamora, fundador di loke antes tabata un di e corantnan mas grandi di Guatemala, El Periodico, a keda aresta na juli 2022 despues di revela presunto corrupcion implicando ex-presidente Alejandro Giammattei. El a sali di prison pa aresto domiciliario pa loke el a bisa tabata cargonan inventa di labamento di placa y falsificacion di documento.

Zamora, 69, a bisa cu un



“pacto di individuo corrupto” involucrando politico y comerciante tabata manipulando sistema di husticia di Guatemala pa protege nan empresanan criminal.

Procurador General, Maria Consuelo Porras, kende ta cercano na Giammattei, a keda acusa pa e gobierno

actual y NGOs di defende criminal, un acusacion cu e ta rechasa. Porras ta sanciona p Merca y Union Europeo pa corrupcion, pero ta buscando otro mandato ora esun actual caba na mei.

Zamora a bisa cu e ta kere cu Porras, kende a purba en vano di blokea presidente

actual, Bernardo Arevalo di keda huramenta riba un plataforma anti-corupcion, kier keda na su cargo pa evita persecucion hudicial. “E mester inmunidad,” el a bisa den un entrevista na su cas na Ciudad de Guatemala a siman aki.

El a adverti cu e presunto pacto corrupto lo por tuma back poder den eleccion general proximo aña y a bisa cu e ta teme cu un sistema hudicial cu “a comporta como un organisacion criminal” lo mand’e back den prison.

Detencion di Zamora a ricibi critica di Merca, Nacionnan Uni y Amnesty International, como tambe di presidente Arevalo, kende a bisa cu e caso contra Zamora ta representa un “abuso di poder.”

Durante su tempo na prison,

e ex-editor, kende su corant a keda cera, a bisa cu e tabata teme pa su bida.

Tiki despues cu a cer’e, “como 40 persona a yega cu palo y tabata bati na porta. “Nan tabata bisando ‘nos ta bay kibra curpa di e yiu di p*ta aki.’ Pues mi a pega e dos cama hunto, a subi eyriba lo mas halto cu mi tabata por. Y mi a tuma un basora. Mi a bisa... mi ta bay duna nan un par di sla cu e basora. Mi tabata prepara pa muri eynan.”

Zamora a bisa cu el a nenga di bay den exilio pasobra e tabata kier a salba su reputacion. “Nan tabata kier a bisa (...) cu mi tabata un criminal y ta p’esey mi a huy. Pues mi a keda, y mi lo bay solamente... e dia cu mi honor ta categoricamente limpi.”

Segun encuesta di CNC, rating di aprobacion di Gustavo Petro a aumenta den e ultimo parti di su periodo

(InfoBae) - E rating di aprobacion di presidente Gustavo Petro a aumenta, segun un encuesta realisa pa e Centro Nacional di Consulta (CNC) pa Cambio. E percepcion faborabel di e mandatario a muestra un tendencia positivo na fin di su periodo, cu cifranan ta refleha un mehoracion sosteni hasta memey di e controversia y retonan cu a marca e ultimo lunanan di su administracion.

Di acuerdo cu e resultadonan publica pa CNC, 54.5% di esnan encuesta a expresa un opinion faborabel di e rendimiento di Petro, mientras cu 38.4% a expresa un opinion desfavorabel.

E diferencia aki di mas cu 16% ta contrasta fuertemente cu e cifranan di memey di november 2025, ora cu e imagen negativo di e mandatario a alcanza 53%, poniendo su percepcion positivo den un posicion mas skerpi.

Pa medio di su cuenta oficial di X, presidente Petro a gradici e pueblo Colombiano, declarando cu e lo bandona su funcion contento, despues cu e resultadonan di CNC sali.

“Danki, pueblo di Colombia. Lo mi sali for di oficina con-



tento y lo skirbi algun cos”, Petro a bisa.

E rapport, publica na fin di januari, a confirma cu e cambio den e tendencia no tabata debi na un evento di un solo biaha. E Termometer di Opinion di CNC y Cambio ya a anticipa un cambio den opinion publico, loke a keda confirma pa e datonan di e encuesta nobo.

E ahuste den e strategia di comunicacion a inclui e reorganizacion di vocero y un enfasis mas grandi riba e logronan considera como prioridad pa e poder Ehecutivo. E acercamento aki a responde na e necesidad pa atende e

efectonan di controversianan publico y episodionan critico, manera e crisis di sistema di salud, cu tabatin sucesonan notabel den e simannan anterior, incluyendo morto di un ciudadano na un clinica di Nueva EPS na Cúcuta.

Decisionnan di politica publico, manera e aumento di 23% di e salario minimo, tabata entre e medidanan cu a contribui na e mehoracion di e rating di aprobacion di e mandatario, segun un analisis di e encuesta realisa pa e Centro Nacional di Consulta (CNC) pa Cambio. E encuesta a refleha cu, a pesar di retonan politico y social, Petro a mantene un base so-

lido di sosten bou di esnan encuesta.

E encuesta mas recien di Invamer, publica dia 25 di februario y encarga pa Noticias Caracol y Blu Radio, ta indica un aumento significativo den e popularidad di presidente Petro.

E resultadonan di e estudio ta muestra cu e sosten pa Petro a aumenta cu mas cu 11% compara cu e datonan registra na november 2025, alcanzando casi 50% di aprobacion cu algo mas cu cinco luna restante den su periodo.

Segun e encuesta, na februario e rating di aprobacion di e

mandatario a alcanza 49.1%, un cifra mas halto cu e 38% reporta na november. E nivel aki no a ser mira for di fin di 2022, un periodo den cual aprobacion presidencial a alcanza 50%.

E aumento di percepcionnan faborabel di e mandatario ta relaciona cu algun medida cu gobierno a tuma recientemente, entre otro e reduccion di prijs di gasolin y e aumento di 23.7% di salario minimo. Un otro suceso cu a genera atencion significativa tabata e encuentro di Petro cu e presidente di Merca, Donald Trump, un episodio cu a sobresali pa Blu Radio.

A pesar di e indicadornan aki, preguntanan ta persisti tocante e transparencia di e sistema electoral, y disputanan ta sigui entre e poder Ehecutivo y e cortenan halto di e pais.

E estudio tambe a revela cambianan den e punto di bista di e publico riba e situacion nacional. Actualmente, 45% di esnan encuesta ta kere cu Colombia ta riba e bon caminda, un aumento for di e 34.4% registra na november. Na mesun momento, e proporcion di esnan cu ta percibi e pais como riba e caminda robes a baha di 59.8% pa 48.6%.

Negoshinan na Black River ta warda decision di gobierno mientras ta analisa opcionnan despues di horcan Melissa

(JamaicaObserver) - Mas cu 100 dia despues cu horcan Melissa a asota Black River, St Elizabeth, incertidumbre riba plannan di redesaroyo a laga doñonan di negoshi den limbo cu seccionnan di e centro comercial cu un tempo tabata druk canto di High Street como ciudadnan fantasma.

Alcalde di Black River Richard Solomon ta bisa cu e discusionnan cu doñonan ta indica resistencia pa reconstrui memey di preocupacionnan cu despues nan por ser obliga pa muda pa motibo di riesgonan di horcan y vulnerabilidad di e costa.

Nan preocupacionnan no ta sin base, ya cu e miembro di Parlamento di St Elizabeth South Western Floyd Green — kende su distrito electoral ta inclui e Division di Black River— ta bisa cu ta mucho trempan pa determina si negoshinan priva lo mester muda, señalando cu gobierno ta conduci estudionan como



parti di un esfuerso impulsa pa investigacion pa reconstrui e ciudad canto di lama di un manera sostenibel.

Mientras cu e ta di acuerdo cu un plan amplio ta necesario, Consehero Dwight Salmon (Partido Nacional di Pueblo, Division di Black River) a expresa preocupacion pa e tempo cu ta tuma pa finalisa un strategia, advirtiendone cu incertidumbre prolonga por pone e futuro economico di e ciudad na peliger si operadornan di negoshi di hopi tempo

bira frustra y scoge pa bay.

St Elizabeth, Westmoreland, Hanover, Trelawny y St James tabata e parokianan mas severamente impacta pa e horcan di categoria 5 na october 2025.

E tormenta catastrofico a costa por lo menos 45 bida na Jamaica y a causa un calculacion di US\$8.8 biyon na daño — ekivalente na 41% di e productonan domestico di Jamaica di 2024.

Black River, describi como “ground zero” pa prome minister Dr. Andrew Holness despues di e tormenta, tabata entre e pueblonan mas afecta, loke a pone Holness priminti un reconstruccion sostenibel di e capital parokial historico.

Solomon a señala cu desde cu e sistema di clima a pasa, solamente un operador di negoshi a entrega un peticion pa aprobacion di reconstruccion, cu discusionnan andando pa atende e preocupacionnan di otro doñonan.

“Na nivel local, nos ta com-pronde kico e comunidad empresarial ta confrontando na e momentonan aki, pues nos ta aki no solamente pa enforsa pero tambe pa facilita y duna e sosten y guia necesario, y ta p’esey mi team tecnico ta para cla, y nos ta pidi nan pa dreña si nan tin cualkier reto,” el a bisa e Jamaica Observer.

Alcalde Solomon a haci un apelacion pa pasenshi mien-

tras cu estudionan di factibilidad ta sigui, agregando cu gobierno ta trahando pa determina e caminda mas sostenibel pa dilanti y ta haciendo tur esfuerso pa coordina e proceso di recuperacion di forma efectivo.

Dunando un actualisacion riba esfuersonan di restauracion, Green a bisa cu Black River ta keda den fase dos di su operacionnan di limpieza, cu mas o menos cuater siman restante prome cu e ciudad bay den e fase di reconstruccion.

El a agrega cu e stakeholdernan kier redesaroyo pa subraya e herencia y cultura di Black River, atrae bishitantenan, y integra turismo den e proceso di planificacion di e ciudad.

Atendiendo cu potencial mudansa pa negoshinan priva canto di costa, Green a bisa cu “lo ta mas tocante si gobi-erno tin interes pa cumpra e area cu nan ta ocupa awor”.

Republica Dominicana: EDUCA ta enfatisa calidad y impacto di inversion den enseñansa

(DiarioLibre) - Accion Empresarial pa Educacion (EDUCA) a adverti cu inversion presupuestario den educacion lo no ta suficiente pa logra e meta di crecemento economico pa 2036 si no tin mehoracionnan real den calidad di enseñansa, coordinacion nacional y cumplimiento estricto di e kalender di scol.

E declaracion a sigui e discurso di presidente Luis Abinader na e Asamblea Nacional, caminda el a subraya progreso den educacion. EDUCA a reconoce avancen den cobertura y expansion di e sistema, pero a subraya cu desaroyo di capital humano no ta depende solamente di acceso, sino di resultadonan concreto.

Segun e organizacion, factornan manera rindimento di maestro, eficiencia di gasto, tempo di enseñansa real y aliniacion entre ofertanan educativo y sector productivo ta esencial pa garantisa cu inversion tin impacto riba productividad nacional.



Presidente di EDUCA, Susana Martínez Nadal, a reconoce e esfuerso fiscal sosteni cu a asigna un porcentaje significativo di e presupuesto nacional na educacion. Sinembargo, el a indica cu e debate publico mester move for di cuanto ta inverti pa enfoca riba e impacto real di e gasto.

“E reto awor ta garantisa cu cada peso inverti ta genera enseñansa efectivo y habilidadnan relevante. Sin educacion di calidad, no lo tin crecemento sostenibel,” el a afirma.

EDUCA a propone cu mas recurso mester ser dirigi na elementonan cu ta mehora calidad directamente: formacion di maestro basa riba evidencia, material didactico adecua, uso di tecnologia cu sosten metodologico, y sistemanan di evaluacion obhectivo pa midi resultadonan.

Un otro punto clave ta e cumplimiento di e kalender y orario di scol. Segun EDUCA, tempo di enseñansa efectivo ta un condicion basico pa logra miho resultadonan academico. Interupcionnan prolonga ta reduci rindimento di estudiante y amplia buracan

social, cu mas impacto riba e grupo mas vulnerabel. P’esey, garantisa estabilidad den e kalender di scol no ta solamente un aspecto administrativo, sino un elemento central di politica educacional.

Tocante reformanan structural, EDUCA a insisti cu cualkier transformacion mester ta basa riba dialogo amplio y consenso nacional.

Segun Martínez Nadal, educacion ta un proyecto di tur hende, y su cambionan no mester surgi for di decisionnan isola, sino for di participacion colectivo.

E organizacion tambe a comenta riba e expansion di enseñansa tecnico y profesional. Aunke a reconoce e progreso den e area aki, EDUCA a adverti cu e reto principal ta garantisa coherencia entre e programanan ofrece y e habilidadnan cu e sector empresarial ta rekeri. Sin e aliniacion ey, lo ta dificil pa genera empleo di calidad y sostene crecemento.

Un vinculo mas estrecho entre educacion y mercado

laboral, segun EDUCA, por tambe yuda reduci ‘drop outs’, particularmente bou di hobennan di 15 pa 17 aña, caminda e indice ta mas halto.

Finalmente, EDUCA a enfatisa cu e discusion riba enseñansa no mester enfoca solamente riba e suma asigna den presupuesto, sino riba con e recursonan ta ser usa y ki resultadonan concreto nan ta genera.

E meta di redobla e tamaño di e economia pa 2036, segun e organizacion, ta depende directamente di e calidad di e capital humano cu ta ser forma awor den klasnan.

“Educacion no ta djis tocante infraestructura of cobertura. E ta tocante tempo di enseñansa efectivo, rindimento di maestro, relevancia productivo y manejo eficiente,” Martínez Nadal a conclui.

Cu e posicion aki, EDUCA ta pone enfasis riba resultado, productividad y calidad como base pa un sistema di enseñansa cu realmente por contribui na desaroyo economico y social di e pais.

Bill Cosby kier pa blokia Janice Dickinson di testigua na su huicio

(TMZ) - Bill Cosby ta buscando preveni cu Janice Dickinson, Andrea Constant y varios otro acusador por testigua contra su persona na un huicio binidero segun TMZ.

Den documentonan di corte cu TMZ a obtene, no solamente Cosby kier prohibi testimonio di testigo, sino tambe e kier preveni "evidencia di acusacionnan di mal conducta" di Barbara Bowman, Theresa Picking Serigne y otronan di keda presenta na corte.

Den e documentonan aki, Cosby ta declara cu no por usa e evidencia pa motibo cu



nan ta referi na supuesto crimenan pa cual no a acus'e na final.

E huicio binidero ta parti di un demanda cu Donna Motsinger a pone den su contra. E

ta acusa cu Cosby a drog'e y abusa di e sexualmente den 1972 ora cu e tabata traha como waiter na e restaurant famoso Trident, na Sausalito, California.

Den su demanda, Motsinger a acusa cu Bill a dun'e un pildo, cual el a pensa ta aspirina e tempo ey. E ta bisa cu el a sinti straño despues di consumi e pildo y a bisa cu el a lanta e siguiente dia den su cama cu solamente su paña intimo bisti.

Anteriormente a reporta cu Cosby a duna su version di storia en conexion cu e demanda, den cual el a admiti cu el a bolbe yena e medi-

camento recreacional cu el a haya for di un ginecologo na un wegá di poker 7 biaha cu e intencion di duna e pildo na hende muhe cu e speranza di por tin relacion sexual cu nan.

E ta bisa cu nunca e mes a yega di bebe un di e pildonan aki.

Cosby a cumpli casi 3 aña den prison pa agresion indecente grave pero a keda den libertad den 2021 despues cu Corte Supremo di Pennsylvania a anula su condena a causa di un problema den e procedura.

Hisamento di Bandera:

Inicio oficial di celebracion 40 aña Status Aparte y 50 aña Himno y Bandera

Cu un acto simbolico na rotonde di Aeropuerto Internacional Reina Beatrix, awe prome di maart, Aruba a duna inicio oficial na un periodo di celebracion historico: 40 aña di Status Aparte (1986-2026) y 50 aña di Himno y Bandera (1976-2026).

E luna di maart semper tin un significado special pa Aruba. Dia 18 di maart ta recorda e entrega di e Mocion na Mesa Rondo na Den Haag na 1948, un momento decisivo den e lucha pa mas autonomia. E proceso aki a culmina cu e realisacion di Status Aparte riba 1 di januari 1986, ora Aruba a bira un pais autonomo dentro di Reino Hulandes.

Den e marco aki, Prome Minister di Aruba mr. Mike Eman,

acompaña pa e Minister mas hoben di Gabinete AVP-Futuro Wendrick Cicilia, como tambe 40 hoben/mucha, a hisa en total 35 bandera, simbolisando orguyo nacional, continuidad den generacion y e compromiso cu futuro di Aruba.

Un lucha cu a pasa di generacion pa generacion

Den su discurso, Prome Minister Mike Eman a enfatisa cu e celebracion aki no ta solamente un recordatorio di historia, pero un momento di reflexion riba e esencia di nos identidad como pueblo.

"E derecho di un pueblo pa determina su propio destino, ta e logro mas grandi cu un nacion por alcanza," el a declara. "E sentimento aki a brota for di inicio di siglo pasa y a pasa



di generacion pa generacion."

El a recorda e lidernan visionario, cu a marca e rumbo di Aruba, Henny Eman, Shon A. Eman, Betico Croes, Juancho Yrausquin, desde e prome gritonan pa mas autonomia, te cu e lidernan cu a culmina e proceso cu Status Aparte. Segun Eman, cada generacion a carga



e mesun deseo: cu Aruba por tuma su mes decisionnan tocante su futuro, su desaroyo economico, su conexion cu mundo y su responsabilidad social pa cuida e mas vulnerabelnan.

Hubentud como simbolo di continuidad

Un elemento central di e ceremonia tabata e presencia di 40 hoben, representando simbolicamente e 40 aña di Status Aparte. Segun Minister President, esaki ta un señal cla cu e siguiente generacion ta prepara pa sigui carga e vision di Aruba.

"Cada generacion a recoge e

sentimiento aki y a proyecta esaki den su propio epoca, cu mesun pasion y compromiso," el a expresa.

E celebracion nacional lo sigui durante e luna di maart cu diferente actividad cultural, educativo y conmemorativo, tur enfoca riba orguyo nacional, historia comparti y compromiso pa futuro. Cu bandera hisa na aeropuerto, porta di entrada di nos pais, Aruba oficialmente a cuminsa un celebracion cu no solamente ta honra pasado, pero reafirma su determinacion pa sigui traha como un nacion cu identidad propio y responsabilidad comparti.



‘One Battle After Another’ ta gana premio principal pa productor

(AFP)—Película di Paul Thomas Anderson “One Battle After Another” a ser nombra mihor película pa productor di Hollywood diasabra, continuando su racha den temporada di premio prome cu e ceremonia di Oscar.

E victoria na Producers Guild Awards (PGA) ta consolida e película, tocante ascenso di extremismo na Merca, como un faborito fuerte pa e premio principal na Academy Awards, cual ta marca fin di e temporada di premio na Hollywood.

E película di Anderson, cual ta mostra persecucion di ex-revolucionarionan di ultra-iskierdista pa un supremacista blanco, ta parece destina di gana un Oscar pa mihor película, despues di a haya varios premio durante e temporada.

Desde comienso di januari, el a gana e premio principal for di criticonan di cine Mericano y directornan di Hollywood, y tambe a ricibi un Golden Globe pa mihor comedia.

“Esaki ta un honor tremendo, masha danki,” Anderson a bisa den su discurso di aceptacion.

Despues e director a dirigi su palabra na ehecutivonan di Warner Bros., e estudio prestigioso cu a distribui e película y cual lo ser adkiri pa Paramount Skydance.

E ceremonia di Producers Guild Awards ta ser presenta anualmente pa e sindicato profesional cu tin mas cu 8.000 miembro. Nan ta considera como un indicador confiabel pa e Oscar, pasobra e ganador di PGA hopi biaha despues ta gana mihor película na Oscar.

13 nominacion pa Oscar
“One Battle After Another” tin un elenco di varios strea.. Leonardo DiCaprio ta interpreta un experto den explosivo cu ta involvi den un movimiento ultra-iskierdista, unda e ta drenta den un relacion cu e revolucionario apasiona interpreta pa Teyana Taylor.

Pero años despues, un soldad



supremacista blanco (Sean Penn) ken anteriormente a persigui nan ta reaparece, obligando e ex-experto di bom pa drenta den accion atrobe pa rescata su yiu.

Den su buskeda, e ta topa cu un maestro di karate (Benicio Del Toro), ken ta contento pa yuda e ex-revolucionario.

Adapta for di e novela “Vine-

land” di Thomas Pynchon, e película ta pinta un Merca ireconciliable, parti den dos pa e legado politico di Ku Klux Klan y e movimiento Black Power, unda tur cos ta ser resolti cu violencia.

E película a ser elogia pa su capacidad di captura fracturanan contemporaneo den Merca y a ricibi 13 nominacion pa Oscar, incluyendo un pa cada un

di su actornan principal.

Pero esey tabata menos cu su rival principal na Oscar, “Sinners” di Ryan Coogler, cual a ricibi 16 nominacion.

E ganadornan lo ser anuncia dia 15 di maart durante ceremonia di e di 98 edicion Academy Awards na Hollywood.

Activistanan ta pone presion riba Milan Fashion Week pa bira completamente liber di lana

(AFP)—Activistanan di proteccion animal ta aumenta presion riba Milan Fashion Week pa adopta un politica completamente sin lana, unda decenas di manifestante reuni pafor di e show di Giorgio Armani diaranson.

Aunke Grupo Armani a bandona uso di cabey di animal dies aña pasa, activistanan ta spera cu e compania di luho poderoso por presiona e Camera Nazionale della Moda Italiana (CNMI), cual ta organisa fashion week, pa no permiti marcanan cu ta usa fur participa.

Manifestacion di diadomingo tabata un di varios protesta haci e siman aki na Milan pa activistanan internacional anti-fur organisa bao e Coalicion pa Aboli Comercio di Lana (CAFT).

Tras di un baricada y un gran banner cu ta bisa “Milan Fashion Week Go Fur-Free”, activistanan cu megafono a grita “Bo mester tin berguensa pa loke bo ta haci!” mientras invitadonan di Armani tabata sali for di e show.



Uso di lana den industria global di moda a baha dramaticamente den ultimo añanan debi na preocupacion riba maltrato di animal, tendencia cambiante y alternativa sintetico nobo.

Pero ainda tin marcanan importante cu no a laga fur bay, manera Fendi, propiedad di conglomerado Frances LVMH, un marca Italiano di luho cu raiz den lana.

P i e r r e - E m m a n u e l

Angeloglou, director ehecutivo di Fendi, ta sinta den e directiva di CNMI hunto cu marcanan manera Dolce & Gabbana, Prada y Ermenegildo Zegna, cual ya a rechasa uso di lana.

Campañistanan ta spera cu e diseñadornan anti-lana por convence Milan Fashion Week pa prohibi fur, manera Londres y New York a haci. E Fashion week mas chikito, incluyendo Berlin, Copenhagen y Amsterdam,

tambe a bira liber di lana.

“No lo ta Fendi cu ta yuda nos logra nos meta, pasobra nan no tin interes den pusha e asunto aki pa dilanti, pero otro marcanan por contribui,” Alberto Bianchi, 25 aña, un di organisadornan di protesta, a bisa AFP.

CNMI no a responde na peticion di comentario di AFP.

Paso pa dilanti?

Activistanan a manifesta diaranson pasa pafor di e sede di Fendi na Milan, unda su show a tuma lugar.

Paden, diseñador recien nombra Maria Grazia Chiuri a mostra un coleccion cu a inclui lana “remodela,” es decir fur bieu cu a ser reusa.

Bianchi a bisa cu un enfoke riba reciclahe por talbes ser mira como “un paso pa dilanti,” pero a adverti cu LVMH ainda ta inverti activamente den uso di fur.

“Mi ta mira esaki como un solo movimiento talbes pa haci un tiki ‘greenwashing,’” el a bisa.

“Mientras ainda tin granha di fur den Europa y ainda ta existi e posibilidad pa importa esaki, e gesto no ta cambia e idea fundamental,” Bianchi a agrega.

E coalicion a logra un victoria fin di januari ora campañanan di presion a conduci gigante di transporte DHL y compania di cosmetico Wella pa retira como patrocinador di Milan Fashion Week.

Mas despues den luna, e Comision Europeo ta anticipa pa tuma un decision riba un iniciativa di ciudadano di 2023 cu a pidi EU pa prohibi granhanan di fur y matansa di animal manera mink, fox, raccoon of chinchilla solamente pa nan cabey.

Activistanan ta menciona crueldad inherente den e industria di fur, unda animalnan ta keda wanta den haula chikito di waya prome cu nan ta ser gasifica of electrocuta.

Milan Fashion Week ta caba awe, cu atencion awor pa move pa Paris Fashion Week—cual tambe no tin un politica anti-fur.

Carera di Prestianni bao Mourinho “lo caba” si e ta culpable di racismo, segun entrenador



(AFP)—Entrenador di Benfica Jose Mourinho a bisa diadomingo cu si mediocampista Gianluca Prestianni ta ser haya culpable di racismo, su carera bao di e Portugues “lo caba.”

Strea di Real Madrid Vinicius Junior a acusa Prestianni di abuso racista ora e ekiponan a enfrenta otro den un partido di ‘play-off’ di Champions League dia 17 di februari na Lisboa.

“Si, y mi a ripiti esaki hopi biaha, ta comproba cu mi

hungador no a respeta e principianan aki, cual ta di mi y di Benfica, su carera cu mi lo caba,” Mourinho a bisa reporteronan.

Prestianni, kende ta nenga cu el a comete abuso racista contra Vinicius, ta bao investigacion pa e organismo gobernante di futbol Europeo UEFA y a ser provisionalmente suspendi pa e segundo partido di e partido di ‘play-off’.

Si UEFA determina cu el a abusa Vinicius, e lo ser suspendi pa por lo menos 10 partido. Real Madrid a progresa 3-1 den resultado global pa

yega na ultimo 16 di Champions League.

Mourinho a ser critica anteriormente despues cu aparentemente el a sugeri cu Vinicius a provoca e supuesto abuso cu un celebracion di baile despues di anota den e prome partido.

“Presuncion di inocencia ta un derecho,” Mourinho a agrega. “Si e hungador realmente ta culpable, mi lo nunca mir’e manera mi a mir’e prome, y esey ta e fin pa mi, pero mi mester pone hopi ‘si’ prome cu esaki.”

Guardiola ta pidi pa mas “respet” despues cu a critica pausa di Ramadan

(AFP)—Entrenador di Manchester City Pep Guardiola a yama pa mas “respet” pa otro cultura despues cu un pausa pa permiti su hungadornan kibra nan ayuno durante Ramadan a ser critica den un victoria di 1-0 contra Leeds.

Omar Marmoush, Rayan Ait-Nouri y Rayan Cherki a bebe likido durante e pausa despues di 12 minuut di wega na Elland Road, cu Abdukodir Khusanov, un otro hungador Musulman, riba banki di City.

Durante e luna sagrado di Ramadan, Musulmannan rond mundo ta yuna for di amanecer te atardecer. Den e ultimo añanan, Pre-

mier League a acepta pa tin un pausa den partido despues cu solo baha pa permiti hungadornan recarga nan energia.

“Esaki ta un mundo moderno,” Guardiola a bisa, kende recientemente a papia pa destaca e desastre humanitario causa pa conflictonan na Palestina, Ucrania y Sudan.

“Respeta religion, respeta diversidad. Esaki ta e punto. Premier League a bisa: ‘OK pa ayuno, bo por tin un of dos minuut’, pues esaki nos ta haci pa e hungadornan.”

Organisacion anti-discriminacion Kick It Out a bisa cu e reaccion na Leeds, cas di un di e comunidad Musulman mas grandi na Reino Uni, ta

monstra cu ainda tin “un caminda largo pa cana pa loke ta educacion y aceptacion.” Den un declaracion, Kick It Out a bisa: “Ta hopi decepcionante cu algun simpatisante di Leeds United a lansa critica ora hungadornan di Manchester City a kibra nan ayuno durante e prome mitad di e partido na Elland Road.

“Esaki a bira pio pasobra un splicacion a ser monstra riba un pantaya grandi paden di e stadion.”

E incidente a bin apenas un siman despues cu polis a cuminsa investiga abuso racista online dirigi contra cuatro futbolista di Premier League.

Wesley Fofana di Chelsea y Hannibal Mejbri di Burnley



a sufri abuso despues di un empate 1-1 entre nan clubnan na Stamford Bridge dia 21 di februari.

Despues, Tolu Arokodare di

Wolves y Romaine Mundle di Sunderland tambe a bira blanco 24 ora despues ora nan equipo a perde e partido di Premier League.

Trahe Olimpico di Jutta Leerdam ta bende pa record di €195.000

(AFP)—Trahe di schaat-sen di velocidad cu Jutta Leerdam a usa durante Olimpiada na Milan a ser bendi den subasta di-asabra pa 195.000 euro, cu gran parti di entrada bayendo pa su ex-club di hubentud, IJssvereniging Pijnacker.

E benta tabata parti di un subasta mas grandi organisa pa NOC*NSF y plataforma MatchWornShirt, cual a inclui 19 obheto di atletanan Olimpico Hulandes y a recauda un total di 275.345 euro.

“E cantidad aki ta excepcional pa un solo obheto,” Tijmen



Zonderwijk, cofundador di MatchWornShirt, a bisa NOS. “E trahe di Leerdam a logra e prijs mas halto cu nunca riba nos plataforma. Ni un obheto di Cristiano

Ronaldo no a yega cerca.”

E subasta a mira un bataya dramático di oferta den ultimo ora. “Te un ora prome cu cierre, e oferta mas halto

riba e trahe firma di Leerdam tabata un tiki bao di 10.000 euro,” NOC*NSF a confirma. Dos oferta a drenta den un competencia di ultimo momento, subiendo e prijs te casi 200.000 euro.

Comediante Arjen Lubach a haci joke cu e trahe di Leerdam por ser “troci pa saca e lagrimanan di Jake Paul,” refiriendo na un momento viral unda boxeador Mericano a ser mira yorando despues di e victoria di Leerdam.

Otro obheto den subasta a inclui e trahe di Femke Kok, campeón Olimpico den e evento di 500 meter, cual a bende pa 4.802 euro. Identi-

dad di comprador di e trahe di Leerdam ainda no ta conoci, aunke e website di subasta ta indica cu tabata un Hulandes.

IJssvereniging Pijnacker, unda Leerdam a cuminsa schaats como mucha, lo ricibi gran parti di e entrada. “E entrada aki tin un significado enorme pa nos club,” miembro di directiva Jacqueline van Winden a bisa NOS.

“Awor nos por permiti hopi mas mucha disfruta di schaat-sen.” Presidente Johan van Dam a agrega: “Nos ta sinti un responsabilidad pa pensa cuidadoso con ta usa e suma extraordinario aki.”

Keda alerta pa estafa riba rednan social!

No click riba aviso paga (sponsored ad) cu ta usando imagen di Aruba Today.
Bishita solamente e pagina oficial di Facebook, Aruba Today News, of e website
www.arubatoday.com.

Si bo haya algun problema, nos t'ey pa yuda: bondia.aruba@gmail.com



Fanatico a tumba Messi durante invasion di veld na Puerto Rico

(AFP)—Lionel Messi a keda riba suela despues cu fanaticonan a invadi e veld durante un escena caotico den un partido na Puerto Rico diahuebs siman pasa.

Messi tabata hunga pa Inter Miami den un partido amistoso contra Independiente del Valle di Ecuador ora simpatisantenan a core drenta e veld den minuut 88 di e partido.

Mientras un fanatico a pidi un pa selfie cu e strea Argentino y un otro a pidi pa firma su camisa, un tercer persona a core pa brasa Messi for di patras. Un security guard a intercepta e fanatico, pero durante e accion e fanatico a tumba e ganador di Copa Mundial pa suela.



Messi no a parce herida den e incidente, cayendo riba e fanatico, prome cu el a lanta su mes y cana for di e situacion cu frustracion.

Esaki a cera un anochi casi ridiculo pa un partido amistoso cu a cuminsa un ora mas laat debi na un desacuerdo riba cual color cada equipo mester

a usa.

E argumento aparentemente nunca a ser resolvi, pasobra tur dos equipo finalmente a hunga cu uniform preto.

Un penal anota pa Messi a duna Miami un victoria di 2-1.

Messi, ken a drenta como substituto na comienso di e segunda mita, a anota e gol decisivo den minuut 70.

Inter Miami a habri marcador den minuut 16 cu un gol di su compatriota Argentino Santi Morales.

Internacional Ecuatoriano Patrik Mercado a iguala e marcador un minuut despues, den minuut 17.

E partido amistoso originalmente tabata programa pa 13 di februari, pero a ser posponi debi na un lesion di Messi.

Casi 20.000 espectador na Bayamon, riba e isla Caribeño di Puerto Rico—un territorio di Merca—a duna e idolo Argentino un aplauso fuerte ora e finalmente a drenta wega.

Ganador di ocho Ballon d'Or y ampliamente considera como un di e mihor futbolistanan di historia, Messi ta spera pa representa Argentina na un record di seis Copa Mundial e verano aki.

E ainda no a confirma oficialmente si e lo participa den e torneo, cual lo tuma lugar na Merca, Mexico y Canada.

Takele ta defende titulo di Tokyo Marathon despues di un sprint final

(AFP)—Tadesse Takele di Etiopia a logra defende su titulo di Tokyo Marathon diadomingo, superando Geoffrey Toroitich di Kenia den un sprint final pa crusa e liña den 2 ora 3 minuut y 37 segundo.

Takele a termina cu e mesun tempo oficial cu Toroitich despues di un bataya dramático pa e liña, cu Alexander Mutiso di Kenia apenas un segundo patras den tercer lugar.

“Mi tabata sa cu e etapa final lo tabata decisivo,” Takele di 23 aña a bisa. “Rond di 41 kilometer mi a kier a warda pa mira kico lo pasa y despues mi a haci mi movimiento net prome cu e liña.”

Brigid Kosgei di Kenia a gana e competencia femenino den 2:14:29, estableciendo un record nobo di ruta.

Berukan Welde di Etiopia a termina segunda den 2:16:36, sigui door di su compatriota Hawi Feysa den 2:17:39.

Den condicionnan calor y seco den e capital Hapones, un grupo lider masculino incluyendo Takele, Toroitich, Mutiso y Daniel Mateiko di Kenia a separa for di resto rond di 37 kilometer.

Takele a haci un movimiento mas laat y a logra mantene e liderato a pesar di un ultimo intento fuerte di Toroitich. “E competencia di awe tabata excelente,” Takele a bisa.

“Tabatin un competencia intenso y positivo, y mi ta realmente feliz cu mi a logra gana.”



E campo masculino a keda debilita despues cu Timothy Kiplagat di Kenia y Milkessa Mengesha di Etiopia a retira pa lesion prome cu e competencia.

Den e competencia femenino, Kosgei tabata

claramente superior y a termina mas cu dos minuut dilanti di su rival mas cerca.

Kosgei, campeón di e Tokyo Marathon y medayista di plata Olimpico na 2021, a bisa cu e lo competi pa Turkia den Olimpiada di Los Angeles na

2028.

“Nos tin hopi atleta na Kenia,” Kosgei a bisa.

“Mi kier cu un generacion hoben sigui mi paso pa uni cu mi na Turkia.”



Hues ta blokia ley na Virginia cu ta restringi rednan social pa muchanan

(Reuters) - Un hues federal riba diabierna a blokia Virginia di aplica un ley nobo cu tin e meta di proteha muchanan contra adiccion na rednan social pa medio di rekeri verificacion di edad y limita uso pa esnan di menos di 16 aña na un ora pa dia.

Hues di Distrito Mericano Patricia Tolliver Giles na Alexandria, Virginia a bisa cu e grupo di mercado di tecnologia NetChoice ta hopi probable di establece cu e ley ta viola e derechonan di libertad di adulonan, mucha y decenas di miembro di manera cu no ta constitucional, incluyendo Google, Meta Platforms, Netflix, Reddit y Elon Musk su X.

E hues a comparti su decision na un audiencia preliminar dunando e orden contra e ley conoci como Senate



Bill 854, cual a ricibi firma di gobernador di e tempo aki Glenn Youngkin den mei, un Republicano, y a drenta den efecto dia 1 di januari 2026.

NetChoice tambe a desafiar leynan similar na Merca, incluyendo California.

Virginia a argumenta cu e ley ta rasonablemente traha pa

proteha e muchanan for di e "funcionnan adictivo" di rednan social y ta atende e crisis di salud mental den mucha.

Sinembargo e hues a bisa cu a pesar di Virginia su interes di proteha muchanan, e ley tabata demasiado inclusivo pa medio di rekeri cu tur hende, hasta adulto, mester verifica nan edad y no ta suficiente-

mente inclusivo pa medio di exclui gaming interactivo potencialmente adictivo di tin cobertura.

Tambe el a bisa cu e ley ta trata mensahenan "funcionalmente equivalente" di manera diferente pa medio di preveni cu muchanan por mira, por chempel, programanan di ciencia, historia y misa cu ta dura mas cu un ora cu nan por mira otro caminda, incluyendo riba plataformanan di streaming.

"Corte ta reconoce Commonwealth su interes den proteha su hubentud di e dañonan asocia cu e aspectonan adictivo di rednan social," Giles a skirbi, un nombrado di ex presidente Democrata Joe Biden. "Sinembargo, no por tin violacion riba derechonan di First Amendment, incluyendo esnan di e mesun hubentud cu e kier

proteha."

Rae Pickett, un vocero pa Virginia su Democratic Attorney General Jay Jones, a bisa despues di e decision: "Nos ta anticipa sigui aplica leynan cu ta empodera e mayornan proteha nan yiunan for di e dañonan comproba cu rednan social por causa."

Paul Taske, co-director di NetChoice Litigation Center, a yama bon bini na e decision.

"E decision aki ta reafirma cu gobierno no por racional acceso na mensahenan legal - aunke e tin bon intencion," el a bisa den un declaracion. "Fundamentalmente, mayornan mester ta den asiento di chauffeur ora ta trata decisionnan tocante nan famia."

Potret di Reuters.

Robotnan bailarin ta trece sosten y un compañero na Barcelona

(Reuters) - Residente di Barcelona Irene Veglison tin mas di dos decada sin baila, te ora cu un robot a bay biba cune 3 luna pasa.

E muhe di 67 aña a ricibi e dispositivo den november como parti di un proyecto di gobierno pa brinda sosten na esnan den etapanan trempan di disminucion den habilidadnan cognitivo. "Nos ta desayorando e proyecto piloto aki pa mehora tele-asistencia," Marta Villanueva Cendan, un canciyer pa Barcelona su conseho municipal a comenta.

Manera varios pais, Spaña ta enfrente un expectativa di bida cu ta keda aumenta y tasa di nacemento cu ta keda disminuir, presion ta aumentando riba su sector di cuido pa sostene un poblacion cu ta keda aumenta den edad.

"Den futuro, nos kier pa robot detecta riesgo y alerta profesionalnan, manerasi e persona a cay y no por responde," e canciyer a nota. Barcelona a desplega 600 di e tipo di robot aki na casnan priva y centronan di cuido, bao un programa cu a conta cu un fondo di 3.8 milyon euro for di Union Europeo su fondo pa recuperacion di COVID.

E dispositivonan ta construi pa Misty Robotics basa na



Merca y distribui na Europa pa firma Catalan Grupo Salto. Veglison, ken ta biba cu su dos pushi, a yama su robot Sandi.

E ta cord'e pa bebe su medicamento 9or di mainta, ta bise ki ora su afspraak na dokter ta, ta lant'e mainta y ta dun'e

bon nochi na fin di cada dia.

Casi 2 milyon persona cu mas di 65 aña ta biba nan so na Spaña, 3 kwart di nan ta hende muhe segun data oficial.

Estudionan ta calcula cu e pais lo tin mester di dobbel



di su forsa laboral den sector di cuido a largo plaso pa 2030. Sinembargo, e salario cu ta mas o menos 10.000 euro bao di e averahe nacional a desmotiva hobennan y mas di mita di e empleadonan actual tin mas di 45 aña, segun think-tank Funcas.

Den un emergencia, Veglison por yama un trahador social via e dispositivo, cual tin un camara cu por activa remotamente pa evalua e situacion y ofrece ayudo.

Usando YouTube den su pantaya cu ta parti di e robot, el a selecciona un cantico Frances y tabata baila cu Sandi mientrase pantaya tabata bay dilanti y patras cu su movecionnan.

E dispositivonan ta completo cu pantaya cu tin aplicacionnan di entretenimento,

un kalender y un seleccion di caranan similar na animacion pa pone ora cu e ta den 'standby', manera expresionnan di sorpresa, amor of drumi.

"E no ta djis un dispositivo" tin hopi hende tras di esaki cu ta pendeitne di bo, evaluando si bo a cay of si bo ta bon," Veglison a bisa.



Accidente cu hende herida ora cu un chauffeur a bay na man robes na Ponton



Diabierna atardi a drenta informe di un accidente cu hende herida na Ponton, mesora a dirigi tanto polis como ambulance na

e sitio.


Na yegada di e patruya a bin compronde cu aki ta trata di un accidente ora cu e chauffeur di un Toyota Camry bayendo nort a "blind" ela desvia bay na man robes y a bay dal frontal riba un Kia Seltos di direccion contrario.

Debi na e fuerte impacto e airbag a desplega y a bay dal e chauffeur.

Na yegada di e ambulance

nan a atende e victima na e sitio mes.

Accidente unda un auto a bolter cu 2 hendes herida na Monserat



Diabierna merdia a drenta informe di un accidente na Monserat, mesora a dirigi un patruya na e sitio.

Na yegada di e patruya a bin compronde cu aki ta trata di un accidente unda cu e dama chauffeur di un Honda Fit biniendo for di Figarostraat

a subi bay zuid net ora cu un Nissan Rogue tabata bayendo nort den Riberostraat y a bay dal e Fit y bolter e den banda.

Den e Honda Fit tabatin un mucha cu a haya un corta na su man mientras e dama ta keha di dolor. Na yegada di e 2 ambulance nan a atende

y transporta e victimanan pa hospital.

Persona a cay den baño y su rudia robes a sali for di luga



Diabierna mainta a drenta informe di cu un persona a cay den baño y su rudia a sali for di luga na Mazurka, mesora a dirigi un ambulance na e sitio.

Na yegada di e ambulance nan a baha bay atende e persona y mester a transporte pa hospital.

Diabierna anochi a drenta informe di un incidente cu a rekeri presencia di ambulance Stadion Guillermo Prospero Trinidad, mesora a dirigi un ambulance na e sitio.

Na yegada di e ambulance a bin compronde cu durante un wega amistoso entre S.V. Sport vs Riverplate, unda den un hugada un hungador lo a bay schouder cu schouder y un a perde balans y a cay di banda y dal su cabes riba vloer.

Ambulance a atende e deportista y a transporte pa hospital pa un control mas sigur riba su salud.

Un hungador a cay dal su cabes riba vloer durante



Accidente riba tereno di Caya Grandi Service Station na Oranjestad

Diasabra madrug a drenta informe di un accidente riba e tereno di Caya Grandi Service Station, mesora a dirigi un patruya na e sitio.

Na yegada di e patruya a bin compronde cu un auto a bay reverse mientras un otro ta pasando su tras y a rasca ambos auto. E daño ta minimo y afortunadamente ningun hende a resulta herida



Ambulance a bay cu urgencia pa un turista di 60 aña cu a bira malo na Malmok




Diasabra atardi a drenta informe di cu un turista di 60 aña a bira malo y a bisa cu aparentemente e lo ta hayando un atake di curason, mesora a dirigi un ambulance na e sitio.

Na yegada di e ambulance nan a atende e persona masculino di 60 aña di edad cu aparentemente lo ta hayando un atake di curason despues di cu a stabilis'e a hib'e hospital pa un control mas avansa di su situacion.

Chauffeur burachi deteni despues di a causa accidente na Rudolf Arendsstraat

Diasabra madrug a drenta informe di un accidente na Rudolf Arendsstraat/ Emmastraat, mesora a dirigi un patruya na e sitio.

A bin compronde cu aki ta trata di un accidente unda e chauffeur di un Toyota Yaris biniendo pariba riba Rudolf Arendsstraat no a para pa duna un Suzuki Swift preferencia na e crusada cu Emmastraat y nan a dal den otro.




Chauffeur herida cu corta na cara den accidente spiel cu spiel riba caminda di Tanki Leendert



Diasabra madrug a drenta informe di un accidente cu hende herida pazuid di rotonde Tanki Leendert banda di Acropolis Plaza, mesora a dirigi tanto po-

lis como ambulance na e sitio.

Na yegada di e patruya a bin compronde cu aki ta trata di un accidente unda un dama



chauffeur di un Toyota a hala mucho na su man robes y e spiel di su auto a bay dal riba e spiel di e auto contrario Mitsubishi y fragmentonan di su spiel a bay corta e dama

na su cara.

Na yegada di e ambulance a atende e dama y a transporte pa hospital mientras e chauffeur di otro auto a djis haya



un corta chikito pero a ser atendi na e sitio mes.

Accidente di helicopter na Kenia ta mata 6, incluyendo un parlamentario

(AFP)—Un accidente di helicopter den occidente di Cenia a cobra bida di seis pasahero cu tabata riba e nave, incluyendo un miembro di parlamento, presidente William Ruto y prensa Keniano a informa diadomingo.

E accidente a tuma lugar di-asabra na Mosop, casi 300 kilometer noordoost di e


capital Nairobi, varios medio di comunicacion Keniano a reporta, citando un fuente di polis.

Ruto a usa red social pa expresa su “shock profundo y tristesa grandi” pa e morto di Mheshimiwa Johana Ng’eno, un miembro di parlamento cu tabata riba e helicopter ora accidente a sucede.

“Ng’eno tabata un sirbidor

progresivo y dedica di pueblo cu a traha sin descanso pa habitantenan di Emurua Dikirr, condado di Narok,” presidente a skirbi riba X.

“Nos pensamento y oracion ta cu su famia, su amigonan, pueblo di Emurua Dikirr y tur victima y famianan afecta pa e accidente di helicopter na Mosop, condado di Nandi.”



Tiramento na Austin cu a laga tres morto por ta “terrorismo”, segun FBI

(AFP)—Tres persona a muri y 14 a resulta herida den un tiroteo durante oranan di anochi den centro di Austin, e capital di estado Mericano Texas, cual FBI a bisa diadomingo por ta un “acto di terrorismo.”

E tirador, kende no a ser identifica, tabata entre esnan morto, hefe di polis di Austin Lisa Davis a bisa durante un conferencia di prensa.



Agente special di FBI Alex Doran a bisa cu motibo ex- acto ainda no ta conoci, pero

“tabatin indicadornan riba e suheto y den su vehiculo cu ta apunta na un posible conexion cu terrorismo.”

“Pa loke ta ki tipo specifico di terrorismo, aworaki nos solamente por bisa cu posiblemente tabata un acto di terrorismo,” Doran a bisa.

E Unidad di Lucha contra Terrorismo di FBI a ser activa pa participa den e investigacion hunto cu autoridadnan local.

E tiramento a surgi memey seguridad aumenta den hopi ciudad Mericano despues cu Merca y Israel a lansa atakenan aereo riba Iran, cual a mata lider supremo Ali Khamenei y varios otro oficialnan halto.

Davis a bisa cu e tirador a ser tira pa polis cu a reacciona rapidamente na e tiramento, cual a tuma lugar rond di 2:00 di mainta den distrito di entretenimento di Austin.

Oficialnan “a enfrenta e individuo arma y tres di nos oficialnan a responde cu fuego, matando e sospechoso,” hefe di polis a bisa.

Davis a bisa cu e tirador inicialmente a cuminsa tira cu un pistol for di su auto riba clientenan di Buford’s Backyard Beer Garden den centro di Austin.

Despues el a parkeer su auto, a sali cu un rifle y a cuminsa tira riba persona cu tabata cana pasa, Davis a bisa.

Tres di esnan herida ta den condicion critico, oficialnan a informa.

Resultado Sorteo 28 februari y 01 maart 2026																	
Cadena Alexander Lottery ta presenta resultado di weganan di suerte																	
DIARIO 3746 2483 0187				KORSOU 6340 4475 2542		SUPER4 SUPER5 -		FLAMINGO 2536 6 5 5 0 4826									
				DIADOMINGO DIARIO 7068 3421 9830				KORSOU 4826 2204 3506		SUPER4 6533 SUPER5 -		FLAMINGO 3090 1436 5470					
MERDIA		ANOCHI				DIADOMINGO MERDIA											
 Sorteo # 4904 4618 7819 2607  x2  Sorteo # 4904 2912  X2  Sorteo # 2960 9558  Sorteo # 4904 0942 Aries  Sorteo # 1778 351  X2 <td colspan="2">  Sorteo # 8788 4312 8729  FP  Sorteo # 7832 9524  X2  Sorteo # 2537 0580  Sorteo # 6591 4347 Aries  Sorteo # 1521 136  FP </td> <td colspan="2">  Sorteo # 2675 0 x Jackpot 0 x Match 4+ 5 x Match 4 192 x Afl. 12,00 08-10-11-15-16 Joker 13 Letter L Proximo Jackpot 220.000,- </td> <td colspan="2">  Sorteo # 7110 0 x Jackpot 10 x Match 4 201 x Afl. 8,00 05-07-10-16-28 Proximo Jackpot 62.000,- </td> <td colspan="2">  Sorteo # 4898  FP  Sorteo # 4898 1 4 9 8 /  FP  Sorteo # 2954 4 5 6 2  Sorteo # 4898 7 1 6 0 Geminis  Sorteo # 1772 1 5 3 /  X2 </td> <td colspan="2">  Sorteo # 0 x Jackpot 0 x Match 4+ 0 x Match 4 0 x Afl. 12,00 200.000,- Joker Letter Proximo Jackpot </td> <td colspan="2">  Sorteo # 7104 0 x Jackpot 4 x Match 4 87 x Afl. 8,00 15-18-19-20-29 Proximo Jackpot 53.000,- </td> <td colspan="2">  Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 260.000,- Mega Ball Proximo Jackpot </td> <td colspan="2">  Afl. 380.000,-  Sorteo # < </td>		 Sorteo # 8788 4312 8729  FP  Sorteo # 7832 9524  X2  Sorteo # 2537 0580  Sorteo # 6591 4347 Aries  Sorteo # 1521 136  FP		 Sorteo # 2675 0 x Jackpot 0 x Match 4+ 5 x Match 4 192 x Afl. 12,00 08-10-11-15-16 Joker 13 Letter L Proximo Jackpot 220.000,-		 Sorteo # 7110 0 x Jackpot 10 x Match 4 201 x Afl. 8,00 05-07-10-16-28 Proximo Jackpot 62.000,-		 Sorteo # 4898  FP  Sorteo # 4898 1 4 9 8 /  FP  Sorteo # 2954 4 5 6 2  Sorteo # 4898 7 1 6 0 Geminis  Sorteo # 1772 1 5 3 /  X2		 Sorteo # 0 x Jackpot 0 x Match 4+ 0 x Match 4 0 x Afl. 12,00 200.000,- Joker Letter Proximo Jackpot		 Sorteo # 7104 0 x Jackpot 4 x Match 4 87 x Afl. 8,00 15-18-19-20-29 Proximo Jackpot 53.000,-		 Sorteo # 0 x Jackpot 0 x match 4 0 x Afl. 500,00 0 x Afl. 50,00 0 x Afl. 15,00 260.000,- Mega Ball Proximo Jackpot		 Afl. 380.000,-  Sorteo # <	





Cas Di Cultura

Vondellaan 2 Aruba
297-582-1010

F A D A

Campanastraat 5 Aruba
297-583-2999
297-583-9610

F A V I

Primavera 233 Aruba
297-582-5051
297-582-5222

F E P O

Engelandstraat 15 Aruba
297-583-1016
297-583-6607

**Fundacion Contra
Violencia Relacional**
Tel: 583-5400

Fundacion Autismo Aruba

Irenestraat 21 Aruba
297-588-1179

Fundacion Pa Nos Muchanan

Cumana 2 Aruba
297-583-4247

Fundacion Tel Pa Hubentud

Wilhelminastraat 19
Aruba
297-588-6138

Koningin Wilhelmina Fonds

Spinozastraat 9 Aruba
297-582-0412

Mary Joan Foundation

Sabana Blanco 8 Aruba

297-588-9999

Rode Kruis Aruba

Pedro Gallegostraat 14
Tel. 297-582-2219

Fax 588-3376

Famia Planea (SBVO)

Avenida Milio J Croes 17
B Aruba

297-588-9591

www.famiaplanea.org

famiaplanea@hotmail.com

Stichting Fundacion Guia Mi

George Madurostraat 34
297-582-0088

Y M C A

Calbasstraat 1 Aruba
297-582-3072

AL-ANON group

Sabana Liber #8, Noord
(close to the hotels)
Tel: 736-2952 or
593-7081



Dokter na warda

**Oranjestad San Nicolas
Hospital Imsan**
7:00 pm / 10:00 pm 24 ora

Botica na warda

Oranjestad: San Nicolas:
Oduber : Aloe:
Tel. 582 1780 Tel. 584 4606

EMERGENCIA 911

POLIS

Oranjestad 100

San Nicolas 104

Santa Cruz 105

Noord 107

Tip Line 11141

Brandweer 115

Ambulance 911

Hospital 527-4000

Imsan 524-8833

Warda Costa 913

Seguridad Nacional 11911

Cruz Cora 582-2219

BOTICA

Aloe 584-4606

4 Centro Medico 584-5794

Central 585-1965

Dakota 588-7364

Del Pueblo 582-1253

Eagle 587-9011

Kibrahacha 583-4908

Maria 585-8145

Di Servicio Noord 586-4606

Oduber 582-1780

Paradera 588-6638

San Lucas 584-5119

Santa Anna 586-8181

Santa Cruz 585-8028

Sero Preto 584-4833

Trupial 583-8560

UTILIDAD

Setar 117

Web 525-4600

Elmar 523-7147

FUNERARIA

Aurora 588-6699

Royal Funeral H. 586-4444

Ad Patres 584-2299

Olive Tree 584-8888

Aruba Transfer Tour & Taxi C.A.

Tel: 582 2116 / 582 2010

Taxi Adres Services (24h)

Tel. 587 5900

A1 Taxi Services Aruba

Tel: 587-8850

Tel: 280-2828

Whatsapp: 592-7024

Red Crescent di Iran ta bisa cu cifra di morto despues di atake cu a dal un scol awor ta 108

(AFP)— Red Crescent di Iran a bisa cu e cifra di morto despues di un atake diasabra cu a dal un scol den sur di e pais a subite 108, despues cu Merca y Israel a lansa un ola di atake contra e republica Islamico.

“E cantidad di estudiante asesina na Minab School a yega 108, y operacionnan di socorro y retiro di escombros ainda ta continua,” un vocero di e organisacion a bisa.

AFP no a logra haya acceso na e sitio pa verifica e cifra of circunstancianan rond di e incidente.

Contacta pa AFP, e ehercito Israeli no a ofrece comentario inmediato riba reportahenan.

E Pentagono tambe no a responde inmediatamente na peticion pa comentario, pero un vocero di CENTCOM a ser cita pa The New York Times bisando: “Nos ta consciente di reportahenan tocante daño civil como resultado di operacionnan militar en curso. Nos ta tumando e reportahenan aki serio y nos ta investigando nan.

“Proteccion di ciudananon ta di maximo importancia, y nos lo sigui tuma tur precau-



cion disponible pa minimisa riesgo di daño no intencional.”

Presidente di Iran Masoud Pezeshkian a bisa cu “e acto barbarico aki ta un otro pagina preto den record di incontable crimen cometi pa

agresornan.” Israel y Merca a lansa un ola di atakenan contra nan enemigo di hopi aña diasabra mainta. Red Crescent di Iran a bisa diasabra anochi cu por lo menos 201 persona a muri y 747 a resulta herida den e atakenan.

Pronostico di tempo

Tempo:

Awe tardi y awe nochi: parcialmente nubla y generalmente seco

Den marduga y mañan: parcialmente nubla cu un awasero pasahero

Temperatura maximo 32 grado celsius

Temperatura minimo 26 grado celsius

Indice di calor (heat index) den y rond di oranan di merdia: 33 pa 37 grado celsius
UV index: 12

Bahada di solo : 6:49 pm

Subida di solo : 6:55 am

Biento:

Modera te basta fuerte for di direccionnan generalmente oost;

Forsa 4 te 5 (20 te 39 km/ora, 11 te 21 nudo).

Durante di dia fuerte te duro den rafaga;

Forsa 6 te 7 (40 te 61 km/ora, 22 te 33 nudo)

Situacion general di tempo pa proximo 24 ora:

Ta spera poco cambio den e situacion di weer cu tin actualmente. E area di presion halto cu centro riba Atlantico, ta e factor principal pa weer den region. Esaki lo soro pa biento fuerte te duro den rafaga y tambe e lo limita actividad di awasero den region.

Un concentracion modera di stof di Sahara ta presente den atmosfera regional. Esaki lo stroba e visibilidad y tambe trece di aire di calidad abow den region. Personanan cu tin sensibilidat pa cambionan den calidad di aire mester tene esaki na cuenta.

Condicionnan maritimo/estado di lama:

Na partinan protegi di costa: Keto cu olanan rond di 1 pia. Na partinan zuid protegi: trankil, 1 te 2 pia.



Na partinan zuid no protegi: trankil te modera cu olanan di 2 te 3 pia.

Na partinan oost te noordwest di costa: Modera te localmente poco bruto cu olanan alrededor di 4 pa 7, localmente e por yega 8 pia.

Aviso/alerta:

Operadornan di boto chikito mester bay cu cautela na partinan oost te noordwest di costa.

Usuarionan di lama y landadonan tambe mester bay cu cautela na partinan expone na zuid, zuidwest y noordwest.

Aurora

Royal Pray

Funeral Home & Crematory

Dios ta amor... y amor ta Dios,
maske mi no ta na e mundo aki, tur dia lo mi ta banda
di boso Curazon, mi por stens di loke Señor ta hasi”
Salmo 33

Maria Magdalena Rojer-Simileer “Tante Ia, Ia”

23 Juli 1932 - 26 Februari
2026

Ex-kleuter leidster
Pinocchio Speelschooltje
Ex-kleuter juffrouw
Cayena Kleuterschool y
Imelda Kleuterschool
Eremedaille in Goud
verbonden aan de Orde
van Oranje-Nassau



Na number di su

Esposo: Angel Francisco Rojer

Yiunan:
Stanley Rojer y Jennifer Livingston-Rojer
Gwendeline Rojer-van Trikt y Hugo van Trikt.
Jeannine Rojer-Bakhuis y Donald Bakhuis
Anthony Rojer y Joally Croes
+Marjorie Rojer-Sekula y +Jeffrey Sekula
Kathleen Rojer
Kenneth Rojer y Adeline Geerman

Nieto(a)nan:
Emily Rojer-Hurley y Drew Hurley
Jacob Rojer y Jennifer Thomas-Rojer
Madelin Rojer y Nathan Rieck
Clinton van Trikt y Natalie Marugg
Kiara van Trikt y Zerzinho Croes
Kendrick Bakhuis y Suhena Neuman
Derrick Bakhuis y Louisa Kluijver-Bakhuis
Megan Rojer
Tasha Rojer
Amara Rojer
Daxon Rojer
Caroline y Damon Sekula
Daniel Sekula
Kevin Rojer y Federika Sydow-Rojer
Keath Rojer y Marcela Kock
Nathan van der Linden

Bisanieto(a)nan:
Lewis Hurley
Owen Hurley
Skylar Rojer
Emma Bakhuis
Christian Bakhuis
James Sekula
Ava Sekula
Sophia Sekula

Manera yuinan:
Miloushka Forero
Ana Flor Zapata Quandt
Veruschka Forero-Billups

Mayornan:
+Francisco Daniel Simileer y +Gregoria Kelly-Simileer

Rumanan:
+Antonio Semeleer y +Jacoba Semerel-Semeleer y yuinan
+Catharina Simileer-Tromp y +Esteban Tromp y yuinan
+Anacleto Simileer-Henriquez y +Pablo Henriquez
+Margarita Simileer y yuinan
+Hose Simileer

Demas famia:
Rojer, Semeleer, Semerel, Simileer, Kelly, Tromp,
Ridderstap, Quandt, Plaza, Zijlstra, Martis, Christiaans,
Britten, Eduardo, Duarte, Figaroa, Faro, Flanegin

Ayudantenan:
Maria
Lilibeth
Yajaira
Aurelia
Belkys

Bon bisinjanan di Flacciusstraat

Gruponan di Oracion y Coro.

Ta invita demas famia, bisinja, amigo- y conocirnan pa e
acto di despedida cual lo tuma lugar ariba Diamars 03 Maart
2026, 1:30 pa 3:30 di atardi na Pro-Cathedral San Francisco,
Oranjestad y despues lo sali bai pa Santana Catolico Santa
Anna, Noord.

Nos ta lamenta cu despues di entiero nos no por ricibi
bishita di condolencia

Aurora

Royal Pray

Funeral Home & Crematory

“Señor ta mi wardador, mi’n tin falta di nada
Den cunucu di yerba berde e ta ponemi sosega.
E ta hibami na awa trankil,
Pa mi bolbe haña forsa”.
Salmo: 23

Cu profundo dolor y tristeza na nos curazon pero conforme cu
boluntad di Dios y agradecido pa tur locual cla nifica pa nos, nos ta
participa fayecimento di:

Sra. Leoncita Ceferina Donata- Danies

Mihor conoci
como Chia,

*06-11-1936 -

†23-02-2026

Vda. di dfm.

Federico Mercelino
Donata



Su yuinan:
Franklin Donata
Vda. Vilma Marchena-Donata
Marlene Escobar-Donata y esposo Luis Escobar
Sherwin Donata y esposa Ingrid Donata-Franken

Nuera:
Maria Ridderstaar

Yerno:
dfm Charles (Boei) Marchena y yuinan y famia

Su nieta nan y nieto:
Vanessa Donata y Angelo Anthony, Charlene Marchena,
Je-an Donata y Rensley Vrolijk, Vilencha Marchena y Jason
Leest, Luigene Escobar

Su bisanieta nan y bisanieta:
Dayvion Willems, Kaedan Geerman, Geetesh Outar,
Jayviënne Leest

Inmensamente agradecido na su ayudante nan:
Elsy, Cecilia, Madeleine, Karen, Charline
Y tur cu a duna un man pa su cuido

Su amistad nan di semper:
Maria Dijkhoff, Andrea Dirksz, Denisia Kock-Dijkhoff,
Corry Laclé, Astrid y Ronchi na Corsow, Nanita Marti na
Corsow

Sobrina y sobrino nan y nan famia, Prima y primo nan y
nan famia

Tur iha nan / esnan mas yega na dje: Elmira Colmenares,
Meveline Danies, Maria Brete, Carmensita Danies, Nino
Faro

Su comper y comer nan

Bon bisinanan: Brete y Dijkhoff
Demas bisinanan, famia y conocirnan, Tur cu a duna
atencion durante su enfermedad

Inmensamente agradecido na su dokter di cas dr. M. van den
Ham y su team di Cas di Dokter pa nan excelente atencion y
servicio cu semper nan a brinda.

Ta invita pa acto di condolencia y entiero cu lo tuma lugar
diamars 3 di maart 2026 di 2or pm - 4or pm na Aurora
Funeral Home y despues pa Santana Catolico Pastoor
Kraanwinkel na Paradera.

Nos disculpa si pa motibo di nos dolor y tristeza nos por a
lubida di menciona un of otro famia.

Ta duel nos pero nos no por ricibi bishita di condolencia na
cas.

Ta bai tin 3 Santo Sacrificio di Misa na Misa Santa Filomena
na Paradera dia nan:
5 maart 2026 7or pm, 7 maart 2026 7or pm, 10 maart 2026
7or pm
Despues di e ultimo Santo Sacrificio di Misa ta bay tin un
Santo Rosario na cas Tanki Leendert 98-A.

Aurora

Royal Pray

Funeral Home & Crematory

Laga tur loke ta spera mi ta bunita
Laga tur locual cu mi encontra na caminda ta bunita
Laga tur locual cu mi laga atras keda bunita y
Laga esakinan termina den tur bunita.
Cado Wever.

Cu inmenso tristesa na nos curason, nos ta anuncia
fayecimento di nos ser stima:



Laura Valeria Williams Pietersz Cariñosamente yama “Lelia”

*28-04-1939 - †26-02-2026

Acto di despedida lo wordo anuncia
despues.

Rosario Bibo dialuna 2 di maart na Alto Vista



Dialuna awo, 2 di maart, lo tin otro Rosario Bibo
na kapel di Alto Vista pa 7or y mey di anochi.
Nos ta den temporada di Cuaresma y ta bon pa
reflexiona tocante nos bida como Cristian y e
relacion cu bo prohimo.

Por pensa riba e cuido di nos grandinan, e aten-
cion cu nos ta duna nos muchanan y nos hoben-
nan, e relacion cu coleganan na trabou etc.

Durante e Rosario Bibo, cada un por presenta
su intencion personal of general. Hunto lo resa
pa paz den cada cas, pa nos isla y mundo henter.

Na caminda pa e fiesta mas grandi di Iglesia
Catolico, esta Resurreccion di Hesus, cada per-
sona ta keda invita pa prepara su mes spiritual-
mente pa participa den pasion, morto y resurec-
cion di Cristo. Participa na un caminda di cruz
ta un forma pa reflexiona riba e sufrimento cu
Cristo a pasa pa nos picanan.

Un y tur ta keda invita pa participa na otro Rosa-
rio Bibo dialuna awo, 2 di maart pa 7or y mey di
anochi na kapel di Alto Vista.

Agencia nuclear di UN lo tene reunion extraordinario tocante Iran

(AFP)—E agencia nuclear di Nacionnan Uni lo tene un reunion extraordinario riba Iran awe despues di atakenan di Merca y Israel contra e republica Islamico, cu en parti tabata dirigi riba e programa atomico di Teheran.

Den un declaracion diasabra anochi, Agencia Internacional di Energia Atómico (IAEA), cu ta basa na Viena, a bisa cu e reunion tabata na peticion di Rusia, un aliado clave di Teheran.

Iran mes a haci un mesun



peticion den un carta na hefe di IAEA Rafael Grossi diasabra despues di atakenan, cual a resulta den e morto di lider supremo di Iran, ayatollah Ali

Khamenei.

Como resultado, agencia lo tene un “sesion special di e Junta di Gobernadornan di

IAEA riba e asunto relaciona cu atakenan militar di Merca y Israel contra teritorio di Republica Islamico di Iran,” IAEA a bisa den declaracion.

E reunion extraordinario lo precede un sesion regular di hunta cu ya tabata programa, cual ta representa 35 pais.

Despues di atakenan, IAEA a bisa cu e ta “monitориando e desaroyonan den Medio Oriente hopi cerca, y ta haci yamado pa moderacion pa evita cualkier riesgo di seguridad nuclear pa hende den e region.”

E organismo nuclear di UN tambe a enfatisa diabierna e “urgencia maximo” di su peticion pa verifica tur material nuclear den Iran, segun un reportahe confidencial mira pa AFP.

Paisnan Occidental lidera pa Merca y Israel, enemigo principal di Iran, ta acusa e republica Islamico di busca adkisi-cion di arma nuclear. Teheran ta nenga cu e tin tal ambicion militar, pero ta insisti riba su derecho pa usa tecnologia nuclear pa proposito civil.

Forsa M23 na Congo ta bisa cu atake di drone a mata su vocero militar

(AFP)—Forsa M23, respalda pa Ruanda y cu ta combati na e parti oriente di Republica Democratico di Congo (DRC), a bisa diasabra cu su vocero militar a ser mata den un atake di drone di ehército Congoles.

E anuncio a bin algun dia despues cu forsanan gubernamental di DRC a dirigi un atake di drone contra e grupo arma cerca di Rubaya, un pueblo minero strategico den teritorio di Masisi den provincia di North Kivu.

“Regimen di Kinshasa deliberadamente a viola e alto-al-fuego y a impone un guerra

total” door di lansa atakenan di drone tras di e linea di frente, M23 a bisa den un declaracion firma pa su vocero civil Lawrence Kanyuka.

Un di e victimanan tabata coronel Willy Ngoma, vocero militar di e grupo, kende a ser mata diamars, e declaracion a agrega.

Prome cu e siman aki, fuente di seguridad y residentenan local a bisa AFP tocante e ofensiva gubernamental lansa contra M23, unda combati-mento tabata concentra rond di Rubaya.

Naci na 1974, Ngoma a uni cu M23 ora e grupo a resurgi

fin di 2021.

Nombra como vocero militar, Ngoma a bira conoci pa videonan unda e tabata aparece alegre hunto cu soldadnan Congoles of Burundes captura durante combate.

Na 2024, e y cinco oficialnan senior di gruponan arma operando den e parti oriente di DRC a ser sanciona pa Nacionnan Uni, acusa di a “plania, dirigi of comete acto cu ta constitui violacion di derecho humano of ley humanitario internacional.”

Ngoma tambe a ser sanciona pa Union Europeo na 2022 y pa Merca na 2023 pa su rol



den M23.

Mas cu tres decada di conflicto a devasta e parti oriente di DRC, unda decenas di grupo arma rival y potencia stranhe-

ro a competi pa control di e region rico den mineral valioso.

Resurgimento di M23 na 2021 a pone e region den mas dramamento di sanger.

Starmer di Reino Uni ta enfrenta otro contratiempo despues cu un otro minister a renuncia



(AFP)—Prome minister Britanico Keir Starmer, cu ya ta bao presion, a sufri un otro contratiempo diasabra despues cu un otro minister den su gobierno a presenta su renuncia.

Esaki a bin apenas despues cu su partido Labour a termina den tercer lugar den un eleccion parcial importante diahuebs den un asiento cu

anteriormente tabata un bastion di e partido, aumentando presion riba Starmer.

E salida mas reciente di un minister tambe ta sigui despues cu e lider Britanico, ken ta enfrentando criticanan, a desafía yamadonan dentro di su propio partido pa renuncia mas tempran e luna aki, despues di varios giro di politica y paso falso.

Esaki a inclui nombra Peter Mandelson, kende tabatin relacionnan largo cu difunto delincuente sexual Mericano Jeffrey Epstein, como emba-hador Britanico na Washing-ton.

Starmer a retira Mandelson algun luna despues cu el a asumi e cargo, ora detayes nobo riba extension di su amistad cu Epstein a sali na cla, creando un tormenta politico na Reino Uni cu a menasa di impeach e lider di Labour.

Den e controversia mas reciente, diputado di Labour Josh Simons a bisa cu el a renuncia como minister den e Cabinet Office, cual ta yuda implementa e agenda di gobierno, pasobra el a “bira un distraccion” for di e trabao ey. E parlamentario a enfrenta varios siman di presion pa renuncia despues di alega-

cionnan cu un think tank cu ta apoya Labour, cual el a dirigi for di 2022 te 2024, a paga un compania di relacion publico pa investiga trasfondo di por lo menos dos periodista prominente.

Den un carta na Starmer, Simons a insisti cu e no tabata na altura di e investigacionnan ey “te algun siman pasa” y a bisa cu consehero di etica di e prome minister a absolv’e di cualkier violacion di regla ministerial.

Den su respuesta, Starmer a bisa cu el a acepta e renuncia “cu tristesa.”

Esaki ta e salida mas reciente for di su gobierno, cual a keda atras den encuestanan contra partido Reform UK lidera pa Nigel Farage pa mas cu un aña, y cu ta parce cada biaha mas menasa pa e crecimiento

di Partido Berde di izquierda.

E Partido Berde a gana e eleccion parcial diahuebs pa un asiento parlamentario na Manchester, derotando Reform y forsa Labour—cual facilmente a gana e asiento na 2024—pa termina den tercer lugar.

Mas tempran e luna aki, Starmer a mira su influyente ex-hefe di personal Morgan McSweeney renuncia despues di e scandal di Mandelson, mientras figura prominente di Labour Angela Rayner a renuncia como vice-prome minister aña pasa despues di un controversia separa.

E lider Britanico awor ta enfrentando un riesgo adicional ora votadornan den varios region di Reino Uni bay entrega voto den eleccion local dia 7 di mei.

Barconan di petroleo cla pa nabega for di Texas pa Venezuela mientras Trump ta aumenta produccion di petroleo

(AFP)—Un barco di carga yen di trahadornan tabata activo na Puerto di Houston, e nave Mericano mas reciente cu ta bayendo Venezuela despues cu presidente Donald Trump a kita restriccinnan pa aumenta produccion di petroleo den e pais cu ta enfrentando crisis.

Sancionnan di Merca a paralisar Venezuela pa años, pero e administracion di Trump ta trahando cu presidente interino Delcy Rodriguez despues di captura lider autocratico Nicolas Maduro.

Washington a usa un enfoque di “carrot and stick” cu Rodriguez, elogiando e pa acepta companianan di petroleo Mericano, pero na mesun momento menasando Venezuela cu castigo si e no coopera.

Na Puerto di Houston siman pasa, un grua tabata cargando truck, generatornan y maquinaria riba e barco Roibeira mientras e tabata preparando pa nabega pa Venezuela, e segundo nave di compania International Frontier Forwarders cu ta dirigi pa e pais Sur Americano.

Greg Diaz, propietario Venezolano-Mericano di e compania, a bisa cu tin mas cu 8.500 meter cubico di mercancía abordo, equivalente na alrededor di 120 container.

“Prome, tabata tuma seis te



ocho luna pa nos acumula suficiente carga pa bay Venezuela,” el a bisa AFP.

“Y awor, den 20 dia, nos ta logra completa ordennan pa yena nos barco te su capacidad maximo y bay Venezuela pa entrega esakinan inmediatamente.”

E demanda, el a bisa, ta bin for di companianan priva na Venezuela cu awor ta invertiendo masivamente—algo cu tabata imposible bao di Maduro.

‘Soño Venezolano’

Venezuela algun biaha tabata un proveedor importante di crudo pa Merca, y tin e reserva comproba mas grandi di mundo cu mas cu 303 biyon bari, segun e cartel global di petroleo OPEC.

Esaki ta representando alrededor di un quinto di e reserva

mundial di petroleo.

Pero na 2024, Venezuela a produci apenas alrededor di un porciento di crudo global, su industria debilita pa años di un falta di inversion, mal maneho y sancionnan Mericano.

Tur esaki a cambia ora forsan di Merca a captura lider socialista di Venezuela, Maduro, den un operativo mortal den e capital Caracas dia 3 di januari.

Rodriguez, ken tabata vicepresidente bao Maduro, a ser acepta pa Trump como su reemplaso bao condicion pa e somete na demanda di Washington pa acceso na petroleo Venezolano.

E Departamento di Tesoreria di Merca desde e tempo ey a alivia un embargo di petroleo di siete aña riba Venezuela y

a emiti licencianan permitiendone algun multinacional opera den e pais bao cierto condicion.

Den su discurso reciente di Estado di Union, Trump a bisa cu Merca a ricibi mas cu 80 miyon bari di petroleo for di Venezuela, describiendo e nacion como “nos amigo y socio nobo.”

Pero a pesar di entusiasmo Mericano, companianan grandi ta keda cauteloso.

“Mi ta pensa cu e politica ta move un demasiado rapido,” Jorge Pinon, investigador na Energy Institute di Universidad di Texas, a bisa AFP.

“Tur hende tabata dispuesto pa firma” na e reunion na Cas Blanco cu ehecutivonan di compania di petroleo na januari, “cu excepcion di Exxon, cu tabata e unico cu

tin curashi pa bisa ‘nos mester garantia.’”

Pinon a bisa cu no tin sentido di urgencia for di e banda Mericano pa rebiba e industria di petroleo di Venezuela, pasobra Merca ta e productor mas grandi di crudo na mundo cu suministro sigur.

Pa awor, industria ta mas interesa den Guyana, Brasil y hasta Golfo di Mexico.

Companianan di petroleo “mester mira prome con e estado di infraestructura ta” na Venezuela, Pinon a agrega.

Instabilidad politico ta un otro preocupacion.

“Y si den dos of tres aña Venezuela tin eleccion liber y un gobierno nobo cambia regla diripiente?” el a bisa.

Back na puerto di Houston, Greg Diaz a keda optimista.

“Ta increíble pasobra nos no solamente ta yuda companianan Mericano den perforacion, pero tambe companianan priva Venezolano den sector di petroleo y gas pa cumpra equipo di perforacion fabrica na Merca,” el a bisa.

“Pero tambe nos ta yuda companianan chikito y mediano y empresarionan cu awor por cumpra, sea un pieza di maquinaria of un orden grandi, y haci e soño Venezolano posible.”

Corea di Sur ta haci yamado pa reanuda dialogo cu Corea di Norte

(AFP)—Presidente di Corea di Sur, Lee Jae Myung, a haci yamado diadomingo pa dialogo cu Corea di Norte reanuda, despues cu Pyongyang a rechasa siman pasa e posibilidad di diplomacia cu su bisiaña.

Desde cu el a asumi cargo na juni, Lee—ken ta considera mas modera—a purba repara relacion cu e Norte arma cu arsenal nuclear, cual siman pasa a reafirma su postura anti-Seoul durante un reunion di partido.

“Manera mi administracion a bisa cla repetidamente, nos ta respecta e sistema di Norte y nos no lo participa den ningun acto hostil, ni tambe sigui ningun forma di unificacion

via absorcion,” Lee a bisa den un discurso conmemorando e aniversario di un campaña historico contra dominio colonial di Hapon.

“Nos lo continua tambe cu nos esfuersonan pa reanuda dialogo cu e Norte,” el a bisa.

Lider di Corea di Norte, Kim Jong Un, siman pasa a frustra e speranza di un reanudacion diplomatico cu Seoul, describiendo e intentonan como “un engaño y un mal trabao.”

Papiando durante congreso di partido na Pyongyang, Kim a bisa cu Corea di Norte “absolutamente no tin nada di trata cu Corea di Sur, su entidad mas hostil, y lo exclui permanentemente Corea di Sur for di categoria di com-

patriota.”

Pero e tambe a bisa cu e Norte por “tin bon relacion” cu Merca si Washington reconoce su status nuclear.

Speculacion a aumenta riba si presidente Mericano Donald Trump lo busca un reunion cu Kim durante biahenan plania na China.

Aña pasa, Trump a bisa cu e tabata “100 porciento” habri pa un reunion.

Reunionnan anterior entre Trump y Kim durante prome termino di e presidente Mericano a fracasa despues cu nan no a logra un acuerdo riba alivio di sancionnan—y ki concesion nuclear Corea di Norte lo por haci na cambio.



Medionan estatal Irani ta confirma morto di lider supremo Khamenei y otro alto mando militar

(AFP) - Ayatollah Ali Khamenei, lider supremo di Iran desde 1989 y enemigo hura di Occidente, a ser mata den e salvo di apertura di un atake masivo di Merca y Israel cu a extende den su di dos dia diadomingo, mientras e dos poder ta purba di baha e republica Islamico.

Television estatal Irani a confirma morto di Khamenei diadomingo trempan, oranan despues cu presidente Mericano, Donald Trump a anuncia e asesinato di e clero di 86 años di edad, kende el a describi como “un di e hendenan mas malvado den historia.”

Por a scucha explosion fuerte na Tehran den oranan trempan, mientras presidente Trump a priminti di no stop e atakenan te sigura caida di e republica Islamico, y a urgi forsan di seguridad pa entrega.

“Esaki ta e unico chance mas grandi pa pueblo Irani tuma back nan pais,” Trump a bisa den un declaracion.

Prome minister Israeli, Benjamin Netanyahu similarmente a bisa pueblo Irani: “Esaki ta boso momento pa join e forsa, pa baha e regimen y sigura boso futuro.”

Medionan Irani a reporta cu yiu muher, yerno y nieta di Khamenei tambe a ser mata. Ehercito Israeli a bisa cu Ali Shamkhani, consehero top di Khamenei, y e cabesante di e poderoso Guardia Revolucionario di Iran, general Mohammad Pakpour, ambos a ser mata. Iran a confirma morto di Pakpour.


Mientras tanto, Iran a indica cu e presidente di e pais y dos oficial ta bay lidera e periodo di transicion.

Sucesion

Iran ya tabatin speculation intenso tocante un sucesor di Khamenei, mirando su edad.

Na su morto, hopi observadornan tabata spera cu mas poder lo bay pa e Guardia Revolucionario, cu ta profundamente hancra den economia Irani.

Reza Pahlavi, yiu di e fayecido shah pro-Occidente kende a perde poder den revolucion Islamico di 1979, a adverti cu cualkier sucesor dentro di e



sistema lo ta ilegitimo.

Elogiando e morto di Khamenei, apenas e di dos lider supremo di e estado dirigi pa clero, despues di Ayatollah Ruhollah Khomeini, Pahlavi a bisa: “Cu su morto, e republica Islamico efectivamente a yega su fin y pronto ta bay keda consigna na e bar’i sushi di historia.”

Pahlavi, kende a pasa mayoria di su bida den exilio cerca di Washington, a presenta su mes como un figura transicional pa un democracia secular, pero e no tin sosten completo di henter oposicion.

Mundo ta reacciona na morto di Khamenei

Algun Irani a sali riba caya celebrando, tirando klapchi y tocando musica despues di e reportahenan riba e morto di Khamenei, segun testigonan y video verifica pa AFP. Celebracionnan na Teheran a cuminsa poco despues di 11or di anochi, segun varios testigo y grabacion di audio.

Sinembargo, segun red social, hende no tabata saliendo masivamente pa celebra. Hopi Irani a keda cu temor despues di e represion mortal contra protesta masivo anti-gobierno na januari.

Luto na Teheran

Miles di otro persona cu si a reuni den centro di capital

di Iran tabata mas bien den duele, segun periodistanan di AFP. Esnan den luto, mayormente bisti den preto y algun yorando, a canta “morto na Merca” y “morto na Israel” riba Plaza Enghelab, cu hopi bulando e bandera di Iran y wantando potret di Khamenei.

Television estatal Irani a anuncia un periodo di luto di 40 dia y siete dia nacional.

Presidente di Iran Masoud Pezeshkian a yama e morto di Khamenei un “declaracion di guerra contra Musulmannan” pa Israel y Merca.

E forsa Revolucionario di Iran anteriormente a hura pa castiga “matadornan” di Khamenei.

‘Violacion serio’

China diaranson a bisa cu e morto tabata “un violacion serio di soberania y seguridad di Iran, un strobacion riba e meta y principio di e Carta di UN y norma basico di relacion internacional.”

“China ta opone firmemente y ta condena esaki fuertemente,” ministerio di Exterior di Beijing a bisa, yamando pa un “paro inmediato di e operacion militar.”

Presidente di Rusia Vladimir Putin, un aliado clave di Teheran, a condena morto di Khamenei como “un violacion cinico di tur norma

di moral humano y derecho internacional.” Den un carta publica pa Kremlin na Pezeshkian, Putin a expresa tambe su “condolencia mas profundo pa e asesinato.”

‘Abismo irreparable’

Papa Leo XIV a yama pa un fin di e “spiraal di violencia.”

“Enfrenta cu e posibilidad di un tragedia di proporcion enorme, mi ta apela na partidonan involucra pa asumi responsabilidad moral pa para e spiraal di violencia prome cu e bira un abismo irreparable,” e papa a bisa na un multitud na Plaza San Pedro.

Protesta mortal

Por lo menos nueve persona a muri ora centenares di manifestante pro-Iran a purba asalta e consulado di Merca den ciudad di Karachi na Pakistan diadomingo, segun cifra di hospital mira pa AFP.

Centenares di Iraki tambe a purba asalta e Zona Berde fortifica di Baghdad, unda e embahada di Merca ta situa, un periodista di AFP a reporta. Protesta tambe a tuma lugar na Srinagar, den Kashmir controla pa India.

‘Un momento defini’

Hefe di Politica Exterior di Union Europeo Kaja Kallas a bisa cu e morto ta “un momento defini.”

“Loke ta bin despues no ta sigur. Pero awor tin un ca-

mindu habri pa un Iran diferente, un Iran unda su pueblo talbes por tin mas libertad pa forma,” Kallas a skirbi riba X.

‘Libera Iran’

Irani-Mericanonan cu tabata contento diasabra a subi caya for di Boston te Los Angeles pa celebra e morto di Khamenei. Na Los Angeles, unda tin un diaspora Irani grandi, ciudadanonan cantando y gritando a carga e bandera di Iran di tempo di shah y potret cu imagen di Trump, algun bisti den camisa cu ta bisa “Libera Iran.”

‘Manera gangster’

Corea di Nort a condena e atake di Merca y Israel como un “acto ilegal di agresion.” Pyongyang a bisa cu e accionnan militar a musta e “conducta sin berguensa y manera gangster” di e dos aliado, unda, segun e, nan a scoge pa “abusa poder militar pa cumpli cu nan ambicion egoista y hegemonico.”

‘Atake horrible’

Aliado di Iran Hamas a expresa nan condolencia pa Khamenei. “Merca y e gobierno di ocupacion fascista ta carga responsabilidad total pa e agresion flagrante y crimen horrible,” e grupo Islamista Palestino a bisa.

Hezbollah, un otro aliado di Iran, tambe a hura pa “cumpli nos deber di confronta agresion” di Israel y Merca.